

山陰江頭宋氏世譜

254
2277
1

半載而歲事將付剗剗  
問序於余余以譜之有  
序類多攀附賢達揚厲  
鋪張今觀宋譜其先世  
在唐宋時代有宰輔大



小二宗兄弟狀元以進  
士成名者相繼六七世  
前序中至確且詳無庸  
詞費但就近代而論如  
宋雪帆孝廉望重一鄉

宋望之孝廉為余姨表  
弟皆文行兼優足以充  
身充宗者其餘列鬻序  
食廩餼領歲薦悉數難  
終蓋其積德者深故食

報自遠詒謀者善故繼  
志自多閱其所修補缺  
畧以臻詳刪繁蕪以就  
簡一家文獻廣厥搜羅  
百世規模增其式廓尊



祖敬宗之意油然而溢於  
楮墨閒矣於戲明德之  
後必有達人知宋氏必  
有後起以紹家闕為東  
南望族焉余故樂為之

序

昔

咸豐十有六年辛酉九

前月上浣

賜進士出身

誥授通議大夫都察院左  
副都御史前翰林院編  
脩加三級媿弟王履  
謙頓首拜撰



山陰江頭宋氏世譜目錄

卷一

卷原序

凡例

卷二

誥敕言

宸翰文

奏疏

卷三

卷三

祭規

祭文

贈言

遺稿

雜記

卷四

遷徙

山陰科目宋元世譜目錄

仕宦世表

卷五

忠孝傳世表

貞節傳世表

宗祠圖

後附行第字目及各支房分

卷六字支世表

卷遠祖世表

卷七

遷江宗世表

世表



蕭邑東涇派世表

後附行第

興州戎籍世系

卷八

遂字支世表

卷九

和字支世表

文字支世表

卷十

齊字支世表

卷十一 支韻

南字支世表

卷十二 支韻

恒字支世表

卷十三 東韻

馨字支世表上

卷十四

馨字支世表下

卷十五 夏韻

山陰江東外上世譜  
馨字夏澤分支世表 夏舊譜誤作下

馨字杭城天水橋分支世表

卷十六

遷江宗譜錄

蕭邑東涇派譜錄

卷十七

遂字支譜錄

卷十八

和字支譜錄



文字支譜錄

卷十九

齊字支譜錄

卷二十

南字支譜錄

卷二十一

恒字支譜錄

卷二十二

馨字支譜錄

卷二十三

馨字夏澤分支譜錄

馨字杭城天水橋分支譜錄

卷二十四

傳誌

家約

跋

卷二十三

文華支譜錄



宋氏世譜卷一

齊魯平開謝去世內人後宗姓增影惑



自越豐邑安仁宋氏世譜序  
 國學上舍生豐邑宋君奎持其家譜謁予請叙之謹按宋氏  
 出于殷後周成王封微子啓為宋公以奉殷祀至三十二代  
 康王偃為齊楚魏三分其地子孫以國為氏世居徐之豐邑  
 迄唐永徽間有諱磻者官邢州長史遂家於邢之南和磻之  
 孫璟開元中拜相皆以德業光於簡策代不乏賢矣璟之五  
 世孫士元舉咸通壬午進士官至山南東道采訪使致仕復

歸于豐之安仁茲譜以士元爲始祖士元三子允克允二子迪迴充一子迪克二子述述皆業儒迪二子長曰芝自號石潭居士次曰蘭有學行迴一子曰蕙官寓汴之雍邱我朝天聖初有諱郊祁者兄弟狀元是其後也芝二子曰簡曰策簡唐頭間官隨州錄事秩滿遂家於隨之應山策博學不仕二子長曰用咸平壬寅進士歷官江淮宣尉制置使致仕自號雪窩逸叟次曰周尚志隱居用一子曰奎卽上舍君也以母老終養居平間慨夫世代久遠宗族散漫恐後世昧厥從來于是參考舊譜而譜以族斷以采訪君爲始遷之祖詳



其所可知也自采訪以上軼之勿錄缺其所不可知也所謂  
眞得古人作譜之法而尊祖睦族之心藹然見於茲譜矣嗟  
夫宗族廢壞之餘譜牒失官之後上舍君乃能本其祖而譜  
之至於千百世之遠斷自始遷之祖而致詳焉是蓋賢於尋  
常萬萬也哉雖然所貴乎文獻故家者非世祿之謂也世德  
之謂也夫保姓受氏以守宗祊是之謂世祿迪德像賢克念  
厥緒是之謂世德宋氏本帝王之胄其明德遠矣爲之子孫  
者祇厥身服厥訓以承乃顯德以宣乃令聞以纂乃前休茲  
可謂世濟厥美無忝於文獻故家者矣豈直世祿而已哉詩



曰貽厥孫謀宋氏之先善於貽謀者矣又曰繩其祖武予有望於上舍君焉又有望於上舍君之後人焉宋氏之子若孫尚勗之哉

宋元豐戊午七月既望

賜進士及第光祿大夫知樞密院事江夏馮京序

會稽日鑄宋氏世譜序

族之有譜尚矣歐陽六一為世譜以依漢年表蘇老泉世譜以禮之大小宗為次文例雖不同皆足以考其世次也日鑄宋氏族譜者祖蘇歐二家而損益折中者也其裔孫元誠慶

元丙辰舉進士第歷守中順大夫知江西撫州府事致仕一  
日偕其弟靈璧縣尉時中過余寓求序其家譜余惟宋氏自  
微子啓封於宋三十二代孫偃爲齊楚所滅子孫以國爲氏  
宗支繁衍蔓延於天下若玉爲楚大夫若義爲楚懷王上將  
號卿子冠軍若宏爲漢大司空若均爲九江守若璟爲平章  
事封廣平郡公諡文貞逮我宋啓隆運有景文公祁忠嘉公  
汝爲代不乏賢忠嘉公爲元誠七世祖景文公則時中之八  
世祖也忠嘉公生南強恩補郎職仕至朝散大夫知金州安  
撫司公事致仕寓居上虞縣之五夫里子樸以蔭補官仕至

山陰江氏上世譜  
僉書樞密院事因言事被貶以迪功郎歸隱徙居會稽之日  
鑄景文公之孫宗年爲剡縣令遂家於剡之方山宗年之孫  
值舉淳熙乙未進士以金部員外郎致仕道經日鑄會叙世  
譜而亦次居於是焉性愛竹自號曰竹坡居士夫自迪功郎  
以降家於日鑄五世矣竹坡以下凡四世矣其間或仕或隱  
皆以德著稱日鑄之有宋氏自迪功郎始而竹坡次之也迄  
今爲會稽鼎族余嘗考之於古同姓而通譜者有之同姓而  
不屑通譜者有之同姓而妄冒其祖者亦有之大非譜之義  
也夫譜者普也譜其親也普其族也譜其親則知尊祖敬宗

矣普其族則知孝弟仁愛矣若元誠時中者得不爲尊親孝  
弟之士乎余故不辭而爲之書  
宋嘉定甲申秋九月旣望寶謨閣直學士楊簡序  
山陰江頭修世譜序  
道在兩間而行於人君子貴乎急先務也知其先務而務之  
則本立而道自生矣何則道本乎身而及於人身本乎祖而  
同乎宗苟世譜之不作忘所自而忽其所敬所親是爲無本  
矣烏足以及其餘哉君子必曰吾身先祖之所委蛻也吾族  
亦先祖之所委蛻也若以本支百世族屬疎遠或析離不常



越南冀北視之若行人則自忘其根本矣身雖富貴行潦  
浮漚奚益哉此吾邑柯西里宋叔蘊氏以世譜歲久殘缺修  
之以明世系序少長別親疏繼繼繩繩因是登錄而不至於  
廢墮開卷一覽使知斯人吾祖也而敬之斯人吾宗也而親  
之則孝弟之心由是而生親親之本由是而立其他所謂仁  
民愛物者自此而推耳是譜之作豈非急於先務者乎譜成  
俾來徵予言爲序嗟夫以一人之身散而爲千百億萬之子  
孫以千百億萬之子孫推而上本乎一人之身則知所以致  
此者豈無所本乎傳曰本深者其末茂澤厚者其流光易曰

積善之家必有餘慶垂統緒者思所以植其本而浚其源使  
雲初繼述百世彌昌豈惟爲子孫者耀潤於目前抑亦祖宗  
所望於後昆也若乃玩春華而忘秋實縱斧斤而伐根株俾  
其先不爲若敖氏之鬼者鮮矣叔蘊氏尚當勸懲於斯則於  
爾宗有光吾言有徵是譜之傳其有旣乎  
明宏治十年歲次丁巳暮春之吉夫  
賜進士及第中憲大夫福建按察司副使愬庵司馬璽序  
重刊味芹府君修譜序  
吾家世譜之傳舊矣洪武間琢玉府君典兵部職方司令史

以才譖見知於尚書茹公瑋蹇公義夏公原吉而茹公尤愛重因遣僮价回取譜帙呈諸公求文翰以增飾之值皇明太宗文皇帝自燕藩起兵入京靖內難茹蹇諸公多遇難府君亦編戶興州戎籍倉皇駭遽譜因失焉所賴伯安府君慮有失亡謄錄一帙晝夜力疾書之以遺後人是則一帙之遺萬金之重也然字畫草率隨人錄其親屬年壽而已先祖培軒府君按六一居士五世題頭拭筆以成譜而條格尚有未備者予更得之歐蘇二家譜牒凡例及唐宋二家文遺見有我先世辭翰舊譜不登錄者增緝譜帙而記錄之歲月駸尋未

果也今衰齡屆七秩子姓輩請及未甚衰憊時修之予意亦謂桑榆景短理無遠炤遂緝其舊而新其制焉先序文以弁首簡次璽文以及試題尊君意也次科貢以及官資致身繇也次遷徙其繇來知所自也次譜圖世次連續之可考也次譜錄親屬年壽之可詳也次辭翰累世文獻之足徵也此特其概耳譜錄中義尤不一要在識文以覩其意焉噫吾人有生固皆委蛻吾之祖考苟無是譜三世五世之祖考罔識矣况千百世之祖考乎吾旣罔識吾祖考千百世之後裔豈復知有吾哉是譜之修其可忽乎然修之一時而傳之千百世



知皆護惜而不至於遺失是在我後人也勉之勉之

明嘉靖四十三年甲子菊月望後二日

遷江十一世孫綱謹識

伯芬府君纂修世譜序

間嘗攷故家世族其能飭紀敦倫者必上敬祖宗下睦宗族  
立人極而扶世教以故親者無失其爲親長者無失其爲長  
尊卑小大位分秩然揆其所由則自族譜始也蓋譜者所以  
合散而一殊者也散者難合殊者難一而遡諸同源共派之  
初則無不合焉無不一焉雖支庶日繁居處多渙而條分縷

晰之自判若列眉燦如指掌則一本之愛油然而生又何至  
有視若途人休戚不關親疎罔別者乎吾族舊有世譜自而  
太庵公贅居江頭沈因家焉斷自所知應以自太庵公爲始  
遷祖且細覽世次遠追本紀乃知由太庵公而上至六世  
夫景文公至始祖然侍郎公其源流爲甚長矣自景文公  
鼎發以後代有顯人科甲累累不絕亢宗者能無景慕而興  
起乎蓋其載在世譜者爲不誣也則譜所繫亦綦重矣哉今  
謹按舊譜來自日鑄家於江頭世世遞衍以至於蘭已十有  
六世矣奈屢遭變革所存舊譜擾攘之餘已多散失又復後

嗣繁興居處遷徙爲舊譜中所未載者比比而是苟不補緝  
修明則宗派不著支流不分遠近親疎不辨並族也而腴欺  
寒異分也而少凌長風俗之漓有不可勝言者則世譜之修  
蓋斷斷不容已不可緩矣然任之者誰乎予曰是予之責也  
夫是予之責也夫然猶遲久而未果也幸有同志兄公路者  
奮然起而爲之凡名行生年婚娶卒葬遷徙之類詳加考訂  
其間舊譜有未載者則闕焉不書蓋信以傳信疑以傳疑亦  
猶作史之意云爾於是倫序分明而昭穆已定支派詳備而  
大小不遺使通族之人按譜以知名因名以知分因分以知

義其於敦倫飭紀親親長長之道庶幾無失矣乎續已往之傳啓方來之述凡我後嗣當知是譜爲所以明人倫敦孝弟珍重而什襲之且各捐鐫資以垂不朽而子子孫孫或於數十年後間一舉行不憚煩費勿替引之是所望也

我遷江始祖 太庵公墓在柯山東麓二世祖 定齋公墓亦在柯山三世祖 衍齋公墓在本鄉長石坂四世祖 郡庠公墓亦在柯山五世祖 梅庄公墓在本鄉長石南  
滙凡此五世祖知其地不知其墓久矣六世祖 宣召公墓在京城禁地 祖妣沈氏墓在項里山昔年舊祠祭祀



竟以六世祖 宣名公爲始祖因始遷祖 太庵公祖妣  
沈氏 宣名公祖妣亦沈氏後人以贅居沈氏相傳遂遺  
太庵公而始 宣召公也相沿數百餘年舉族罔知予於  
戊戌之歲閱世譜適新祠告竣言於 先大人奉 太庵  
公於上以正錯誤而族人始知 太庵公爲始祖 宣名  
十公爲六世祖也則甚矣譜之不可不讀也

大清康熙十三年甲寅春三月上浣之吉

遷江十六世孫希蘭撰

蘇州公路府君修譜序

凡爲人後者昭我孝思莫大於繼述前事夫繼述前事有一傳再傳而已者有垂十百世而不朽者稽古徵今承前善後予於家乘謂所當甚重而至要者蓋以一人之身散而爲千百億萬之子孫以千百億萬之子孫推而本乎一人之身苟不於譜牒詳明將何以睦親疎別尊卑明昭穆一遠近乎王子之秋族兄仲眉持舊譜一帙以示剡縣同宗其中所載類多散失錯落且頁亦糜爛觀之殊深感抑爰思修緝以示同人僉曰非數十金不能舉其事也遂遍知族人各諭捐金至再四而輸應者寥寥噫金彙維艱一至此乎由是矢以一人

獨任志彌堅心彌力癸丑春謹按舊譜規例其中前後次序  
誥敕王章科名官錄并夫詩文傳記生卒喪葬循序詳集且  
倣史氏五世題頭定式自一而五自五而十一脈貫下使後  
世閱譜者開卷明灼又分別支派以便稽詳信者書疑者闕  
以示實跡永垂從前散失悉加訂正嗣後繁枝依次循書俾  
親疎遠近尊卑小大各無紛亂者是所賴於纂集之精詳也  
夫春秋一書義例森嚴事關名教當書則書當削則削紫陽  
綱目踵事春秋統緒相垂條貫井井家乘云者亦猶春秋綱  
目之遺意也所以小緒同宗先人因同科第以訛稱今既詳

明理宜改正所謂當書則書也間有隨母來家竟同我姓抑  
或外孫入繼儼列班排今不删除一傳再傳恐滋混亂所謂  
當削則削也承先人之垂業昭後季之方興以永百世於不  
朽者非譜序之至要者乎凡我後人追崇前烈有繼起而遵  
述成規永守勿失則又祖宗之幸後世之幸也  
康熙十七年戊午秋七月上浣之吉  
遷江十六世孫希輅謹識  
昔宋景文公有言曰聖人知俗之易失故尊尊以示恭親親



以教愛悌幼以訓慈先長以興讓然後風俗敦龐旨哉言也  
顧以一人之身不數十傳而子若孫以千億計非有以紀其  
世族鮮不一本焉而塗人之則譜之詎不重哉夫譜于何昉  
周禮小史奠繫世辨昭穆漢史遷作三世表旁行邪上竝效  
周譜而漢復有鄧氏官譜魏晉以降譜姓氏譜百官譜英賢  
衣冠詳矣然皆史官所記非一家言南史韋鼎作韋氏譜北  
史劉善經作諸劉譜其世譜所由昉與後所尚者惟宋歐陽  
氏蘇氏二世譜蓋文忠依漢年表明允依禮大小宗例不同  
而世次易考修譜家多宗之山陰江頭宋氏世譜卽參用歐

蘇法者也考其先系出微子啓而實爲景文公後景文公家  
雍邱有孫昌齡公舉政和進士官中書令南渡時知紹興剡  
縣事卽家于剡昌齡公孫元甫公舉淳熙進士官金部員外  
郎致政歸經會稽日鑄嶺聞其族人有家于嶺上者因叙譜  
而同居日鑄元甫公子太菴公贅山陰之江邨世居焉族滋  
大爲吾越冠姓故其譜以遷江之太菴公爲始祖而又追景  
文公已上七世祖遯翁公爲始祖所自出可謂遠矣顧自康  
熙初年修譜後僅存鈔本閱百數十載丁日繁而復多轉徙  
他處譜亦稍稍散失脫不增葺剗刷不至于所謂塗人者不

止景文公二十五世孫宋君穆用是瞿然旁搜遠紹復跋涉  
山陬海澨遍訪支派凡四歷寒暑始行告歲而請序于余余  
惟譜學之失景文公新唐書所載綦詳文之弊尚官官之弊  
尚姓姓之弊乃至於尚詐譜不可問而風俗以衰故曰鄉黨  
之行脩則教化之風美夫以區區一譜而有關於教化譜詎不  
重哉我輩雖會歸自散其類夫官來于譜生於因於譜  
國家睦九族以平章百姓於變之化上埒伊耆宋君生際時  
雍篤孝友于家又克竟其先人數百年莫克竟之緒則足以  
示恭教愛訓慈興讓矣然亦見吾鄉風俗之美有如此余故

樂爲之序云

嘉慶十有七年歲在壬申夏五月

賜進士及第

誥授通議大夫都察院左副都御史前翰林院編修莫晉頓

首拜撰

翰以唐文粹日官費以存獻此狀立錄銘贈書晉顯光  
世以諸故傳詩于世以招來詩今予首刊詩勸策六序  
精考更徵然仍不與萬無之意以爲之序  
一舊例士是選江前年十三代及選江於之所自出也



凡例

一舊譜世表五格爲板板列五世親盡則仍以五世者提  
起蟬聯接寫並另立譜錄備載生卒行實原仿歐陽氏  
遺式也茲仍其舊

一舊譜首列誥勅重王章也次列遷徙明宗派也詩詞文  
翰以志文科目官資以存獻凡狀述誌銘贈言胥關先  
世行詣故備載于後以昭來許今于首列誥勅後次序  
稍有更置然仍不失舊譜之意

一舊例上追遷江前一十二代重遷江公之所自出也但

始遷之祖自日鑄來江有古別子之義按禮別子爲祖  
繼別爲宗則遷江之當祖也百世勿易故別前代而另  
表爲世首惟前宗祠神牌向追遷江前十二代相沿  
已久不便更改應仍其舊

一譜以收族舉族之分者合之崇一本也勸親親也故凡  
有出外立業成家子孫繁盛者另立分支一律詳載入  
譜如遷徙靡定離鄉未久者仍載本支于名下註明現  
住某處以備日後查考至族有徙居遠方一時無從查  
詢及遷移近地間有查錄未周者俟查明續入

一信以傳信疑以傳疑故凡疑而未信者概闕不書  
一無子立繼俱于本生及所後之下大書以重宗祧  
一婦人被出及改嫁者不書與廟絕也其生有子女者則  
一下註某氏出以別之本不惜費財刻錄其始末  
一異姓亂宗垂戒昭然世俗每多螟蛉異姓或將外甥內  
姪過繼爲後者又有娶妾婦爲室攜帶前夫之子來家  
者亦有懷孕而來過門生育者勢難概禁老譜例內俱  
不錄載原以絕異姓亂宗之漸第數十百年後既不令  
其歸宗必致任其冒姓若子若孫世世相傳亦竟忘其

所自出修譜者不知根底反疑老譜之遺漏而竟增添  
入譜者事或有之此次修譜查有前項異姓爲嗣者俱  
於本人名下特爲書出以免日後疑貳其所生子孫仍  
槩不錄入

- 一書譜列名若未命名者暫書其行於首以俟續入
- 一此次修譜固不辭勞亦不計費但族衆散處者多難免  
遺漏叅訂校讐亦恐有舛錯願我同宗互相查攷隨時  
補正如有寓居在外未入譜者告知續入
- 一譜內各有空隙凡存譜之家如本支近支續有婚嫁生



卒等項均望隨時填註庶下次修輯時彼此校對易於

查考

一舊譜字句錯訛頗多其有可考証及可以意會者已悉

為更正餘仍其舊以俟詳考

一遷江後屢艱于嗣至八世始有七宗故譜內分為七支

今查出蕭山東涇一支分在八世之前且係遷江宗子

故另列于首以崇大宗

一舊譜七支冠以亨春彬賢壽常蘭七字惟七字乃祖

先之名理當避諱今按名易號將亨春彬三字易為遂

和文賢壽常蘭四字易爲齊南恒馨以避祖諱

一舊譜科目官資併爲一類但其中有登科目而不出仕者有出仕而不由科目者今將科目仕宦分爲兩門且將從前遺漏者按照世表逐一補載

一舊譜中於忠孝節義缺未表揚今添忠孝一門貞節一門以揚潛德而光譜牒其已邀欽旌者不復贅述

一舊譜七支各立行第字目以別支分長幼應仍照舊規一生子命名必有公共一字以分班輩庶世次不致混淆向自一世至十三世俱係單名而無公字自十四世至

二十四世後江頭編思應希日維世宏道必宜佳十一  
字本無意義茲自二十五世起復添十六字曰德泰山  
特學滄海積貫才厚施昌齡裕澤卽用

景文公像贊中語庶後人知所象賢此十六字用周再行  
續擬前江頭向分四支各自編排今因齊南恒三支從  
前漏未續編此時補編無用爰將馨字支原定行第字  
目作爲前江頭公共通行字目以昭畫一

山陰江頭宋氏世譜卷一



山陰江頭宋氏世譜卷二

誥

勅戶部侍郎宋士元誥

朕以天下之財給天下之用然念小民供賦之艱未嘗不每  
事節縮以求利久遠爾資性宏毅操履端方務會計當而出  
納均利弊清而軍需足尚益量盈虛之節約輕重之權以佐  
裕國裕民至計

唐咸通十三年九月

宋



贈宋駢平章軍國重事開府儀同三司封陳國公誥

本深者末茂澤厚者流光審諸平章軍國重事宋庠之祖福祿足徵矣以簪纓之世胄爲文學之通儒致身則志在致君愛民則心同愛子匪一朝不懷乎種德匪一念不澤乎存仁是以岡陵挺生梁棟之材宗廟盛添瑚璉之器社稷是賴人民是宜茲特贈爾爲平章軍國重事開府儀同三司封陳國公不惟寵捐世之一臣將以勸効忠之多士

宋皇祐二年三月朔日

贈范氏陳國太夫人誥命缺

贈宋曜平章軍國重事開府儀同三司封楚國公誥

朕俾臣鄰榮及其先者卽古帝王賞延於世也推恩之典逮  
下之仁一舉兩得矣爾宋曜乃平章軍國重事宋庠之祖致  
身有術律已無違已嘗見其子民會不忘其厚俗旣浚源於  
世澤宜挺秀於孫枝柱石邦家光榮祖考特贈爾爲平章軍  
國重事開府儀同三司封楚國公錫爾綸綽於旣亡昭我皇  
恩之浩蕩

宋皇祐二年三月朔日人誥

宋皇贈賈氏楚國太夫人誥

室家攸宜允稱乎閨秀幽閒素著不外乎坤柔爾賈氏乃平章軍國重事宋庠之祖母闔職旣修母儀靡忒相夫以榮其室夫榮光被乎裙釵教子及其孫子孫聯登乎仕籍其膺祉而福履已綏乃推恩而馳封是及茲特贈爾爲楚國太夫人不惟恩波渥被於九原將同內史並輝於弈世

宋皇祐二年三月朔日

朝臣田勳國太夫人誥命



因生之年百歲日錫奎第來家云

錫奎公 孔曾內中昭獨一已子曰身特善也

夫妻合葬於陽祈揚是子所

生三子

長錫喜 小名阿成 現在夫家居蘇州向洋烟地

次錫瑞 小名十九 寓居在板橋小橋下 現在張家口

三錫奎 小名阿英

伊云曰錫奎家自叔長元儒王刃有能  
得似這官具心直也 潼河外島老帝  
作那工產是也 回來古值世病故也  
有皮尋兒石坡看板云云 首主



贈宋玘平章軍國重事開府儀同三司封秦國公誥

懋官在德懋賞在功古之制也茲爾平章軍國重事宋庠合  
鼎舊膺允任腹心之寄樞機備列殫效股肱之勤蓋由爾父  
玘教子有方睦其成績有忠不爽亶矣家傳茲特贈爾爲平  
章軍國重事開府儀同三司封秦國公推及之榮不顯之命  
夫豈易得爾雖已歿尚其欽哉

宋皇祐二年三月朔日  
領錢凡秦國太夫人誥

贈錢氏秦國太夫人誥

推榮由子報母氏之劬勞錫祐自天彰朝廷之寵眷爾錢氏  
乃平章軍國重事宋庠之母閨闈之範肅於往時教育之功  
見於今日子克致身者駁歷不外乎義方親堪逸老者康豫  
實資於祿養况嘗配諧名宦固宜並受馳封茲特贈爾爲秦  
國太夫人恩典特頒休光永賁

宋皇祐二年三月朔日

秦國太夫人乃荆南府君繼配按荆南府君行狀繼配氏  
鍾核與景文府君神道碑元獻公傳載相符此誥氏錢姑

兩存之

平章軍國重事開封府同三司使秦國公誥

擢授宋庠平章軍國重事制

卿才博而周氣剛以大原其抱負夙出於倫見諸設施皆合  
乎道持身挺節巍巍真社稷之臣謀國盡忠奕奕乃廟堂之  
器擢登宰輔實首中臺恢復厥圖協予至治爾其欽哉

宋皇祐元年己丑八月十日頒下  
其後事就館讀舊圖  
鼓鐘而禮之富會慎人其稔獻文鄉食以豐昭元宰員揆劃  
因重車宋車之室圖銀鑄而誠首輿圖而具慈漸而夫興  
圖有翼萬宜於也致繁亦習集余醉肉醉爾陽及於平章軍  
餽也况萬國夫人著



贈胡氏莒國夫人誥

國有良雋宜佐明廷家有賢妻允稱內相爾胡氏乃平章軍國重事宋庠之室闡儀謹飭而婦道靡虧福履懋膺而夫榮是賴裙釵之富舍斯人其孰堪之祿食已豐配元宰真無愧矣命婦之大誰復逾焉肇訓之遵乃其餘耳特贈爾爲莒國夫人示我寵錫之優俾爾馳封之並

宋皇祐二年三月朔日

平章軍國重事



改授宋祁龍圖閣直學士制

明揚士類賢才接武於通衢序列朝班俊髦比肩於近陛各司乃務以佐朕躬然坐而論道者三公講讀之僚義同啓沃作而行之者百辟樞筦之總事並中書地有差殊任無彼此比者詞員宋祁避兄庠叅議之嫌謝在己翰林之職俾仍學士改授龍圖俯徇懇祈爾其允愜茲乃非常之選實惟耆舊是膺

宋皇祐三年六月二十日

對宋祁龍圖閣直學士承旨

陞授宋祁翰林學士承旨制

卿擢秀巍科累功庶職抱負之偉已見於設施文學之優直  
充乎作述據縱橫之大筆足潤色乎皇猷况當青史之編允  
入玉堂之選翰林乃深嚴之重地承旨宜耆宿之名臣匪卿  
是膺其誰可任應賴腹心之助以光綸綍之司惟究乃心欽  
予時命之書百朝蘇轍之繼專並中書此有差矣

宋皇祐五年四月三日而備載青三公補贈文增美同齊

明制士讀習古對左然嚴肅京民博現對筆出景然並

好對宋派韻圖開前學士



御製翰林承旨宋祁像贊

公之德泰山其特公之學滄海其積對策金門臚傳第一馳  
翰苑之名任承旨之職天貫其才而厚其施世昌其齡而裕  
其澤遺像凜然芳名赫弈

宋至和二年二月朔日

宋蘇輿承旨宋祁像贊  
宋蘇輿承旨宋祁像贊

陳林以退軍雖善不敷姓以自與同巖掌出味必對不不  
對對宋蘇輿承旨宋祁像贊

陞授宋值金部員外郎敕

卿持心近厚經德不違故起自均司擢掌出納必使下不病

民上能裕國食足兵強乃為稱職乎皇賦况當奇史之編允

宋紹興元年二月七日曆之重地承旨宜齊情之義遠匪

宋至麻津平在員職臣心之助以光維維世同德至居心欽

其巽靈射製然若各赫奕

解展之各奇類旨文鄉天貫其本而舉其誠甘昌其備而

公之齋泰山其耕公文學節賦其蘇機策金門觀新策一

聯繫林承旨宋派射贊



贈宋廷莖修職郎敕

任使需才稱職志在官之美馳驅奏效報功膺錫類之仁爾  
候選從九品宋廷莖迺浙江杭州府昌化縣教諭宋以治之  
父雅尚素風長迎善氣弓冶克勤於庭訓箕裘丕裕夫家聲  
茲以覃恩贈爾爲修職郎錫之勅命於戲肇顯揚之盛事國  
典非私酬燕翼之深情臣心彌勵

大清道光二十五年十月十五日

報章丑八品人

贈章氏八品孺人敕

奉職無愆懋著勤勞之績致身有自宜酬鞠育之恩爾章氏  
迺浙江杭州府昌化縣教諭宋以治之母淑範宜家令儀昌  
後早相夫而教子俾移孝以作忠茲以覃恩贈爾爲八品孺  
人於戲賁象服之端嚴誕膺鉅典錫龍章之渙汗允播徽音  
大清道光二十五年十月十五日

刻置於此品宋以治母淑範  
宋以治母淑範志在育女美嫺  
宋以治母淑範志在育女美嫺  
宋以治母淑範志在育女美嫺  
宋以治母淑範志在育女美嫺

贈宋詩登仕佐郎敕

設官分職昭器使之無遺錫類施仁喜蒙恩於伊始爾宋詩  
迺江西撫州府臨川縣溫家圳巡檢宋秉鈞之父秉心淳樸  
飭行端方教誨懷式穀之勤政事本貽謀之善茲以覃恩  
贈爾爲登仕佐郎錫之勅命於戲一命得以逮親遂膺曠典  
庶政期於稱職允荷榮光

大清道光三十年正月二十六日



封屠氏九品太孺人敕

登皇路以馳驅忠原本孝入庭闈而侍奉嚴必兼慈爾屠氏  
迺江西撫州府臨川縣溫家圳巡檢宋秉鈞之母性本柔和  
飭衿鞶於閨內教惟勤慎紆章服於庭前茲以覃恩馳封爾  
爲九品太孺人於戲所親邀優渥之恩勉圖懋績有子效靖  
共之誼宜播芳徽夫孺之德如事本報斯之善茲以覃恩  
大清道光三十年正月二十六日欽宋秉鈞之友秉鈞朝對  
稽首伏願聖鑒勅之誼懋績於心實思於時故爾宋  
顛宋指登升封明煉



宸翰

國朝

高宗純皇帝御製題元獻景文集並各書其卷首

宋庠宋祁兄弟同負盛名且同舉進士時以大小宋並稱乃其官位一至宰輔一爲尚書事業所就旣殊性情亦奢儉各異故其詩文沉博新警因各隨其性之所近而爲世所傳誦則同及戒其子不令刊類文集行世亦同迨其後雖經合刊繼而仍歸散佚又同茲復裒輯成集並以聚珍版印而流傳之又無弗同其同不同之故庠與祁固無能知之余亦烏從

而知之然其散也由於自欲韜晦而其聚也幸有永樂大典

之僅存佚之於七百餘年以前宋天聖至今七而完之於三

百餘年以後明永樂至今三則又復歸于同余因合題一詩

並冠於兩集簡首更使之不同而同則向之所謂同不同者

皆可勿深論是之謂大同

二宋合刊曾紀王

宋嘉定間郡守王允初倡議欲合刊二宋集以屬郡文學陳之強未就而去其後太

守陳芾捐貲刊成之見之強序惜哉分集失傳詳學如有本終難晦行不負

言久益彰伯也孤風標雅操仲兮強識富文章雖稱儉過及

奢過弗媿元方與季方收拾碎珍得全册吟題七字冠前行

休嗤大典紛割裂愛禮幸茲存餼羊

奏疏

詔議財用區處事宜疏

有旨諸省多因兵毀大宜創修當議財用區處之宜以聞臣  
竊惟致治以養民爲本養民以節用爲先我朝自開創以迄  
於今經費之煩較諸武德貞觀間十倍其三五矣大司農病  
不堪支不免責之諸路諸路錢穀之司亦病於牽迫率意徵  
歛在在煩苛猶不足以塞其課殿之責民之困窮亦遑恤哉  
此無他兵興以來逆賊相踵震驚於郡邑羌戎伺隙竊發於  
邊陲王師致討歲月堆疊行賚居送耗費不貲兼之河北諸



鎮擅其租稅數十州無升斗之入故惟取足於民腴膏吮血以濟急一時千百載經常之制蕩無根底是以民多困窮顛連而無告者可數也農里間戶有丁耗田多廢耕逋租掛欠盤積於簿書貧弱逃亡責賠於親屬此農民之顛連而無告者也市易間塵多徵困關有稅窮檢防法重已截其貫錢搜匿令嚴累空其囊橐此商旅之顛連而無告者也以至繕修城堡督製刀兵窮徹昏曉而莫卹其疲勞餼廩不充而誰軫其饑餒此工役之顛連而無告者也戰卒凶殘主帥不知防戢所至搶攘甚於寇盜雞犬菜茹爲之一空此屯營之顛連

而無告者也其他未及枚舉而民困亦未及少蘇所謂百姓  
不足君孰與足之秋豈可大興工役不惟病民亦將病國矣  
爲今之計莫若植頽補缺葺其一二以俟財力充裕隨宜建  
營庶百職得以効勤兆民亦皆稱賴萬全之美也臣敢昧死  
以聞謹議

唐乾符元年三月朔日戶部侍郎宋士元疏

賀生皇子表

寶佑叢休天支毓秀慶騰秘禁權溢中區恭惟皇帝陛下受  
命溥將凝圖丕顯權綱相父根乎克念之虔簡素攸安表于

山陰江表外史世譜  
不勉之懿且復斂刑薄賦重穀弛畋一方少饑則係馳使節  
萬金稍乏則輒續禁錢民用靖嘉神罔怨恫是以上帝歆佑  
三后顧存貽美孫謀昭衍無疆之烈歸功元首茂啓多男之  
祥誕協仲商挺生哲嗣星弧具禮天地交華惟翕闢之殊英  
固覃訏而絕異遐聆詔諭並仰獻儀薦笏相趨忭吾君之有  
子珪璋流愛宜天下之繫心臣始去近聯遽承吉語賡歌綿  
瓌早知周德之遐叅祝祠禱罔逮漢臣之幸

宋天聖七年八月大理寺丞兼國子直講宋祁表

而請下罪己詔並求直言疏

宋祁表

臣聞王者父事天明母事地察政合而祥至道失而咎臻自然之應也然至亂之世不能絕祥至治之世不能無咎僻君以祥自泰故益侈而趨亡賢主以咎修德故愈畏而蒙祉則祥無必慶咎無固凶視銷伏之如何耳臣伏見頃歲以來災眚數見依類托寓異占同符天本示法而尊乃有躔離流薄之變地當安固而靜乃有都國震動之占陛下祇奉郊丘歲豐月潔當蒙介福翻至大異何哉得非事有召奸法有階隙者焉天於宗室諄諄存顧先幾預慮以啓聖心欲陛下居易圖艱緣微警著奮揚剛德固執主威厭銷未萌以光丕業焉



臣伏讀前史五行志以驗於今累威重譴不可不察若乃羣星流散則民人蕩析之象也月行黃道地震州邑則邊戎伺間臣下擅恣后妃將盛年穀且饑之兆也去年火災興國寺浮屠延燔藝祖神殿已而盜壞宗廟鉅器者再此皆神不昭格之意也自昔災異之應遠者十數年近者三四年隨方輒應類無虛已陛下何不暫澄思慮推求其端方今典刑設張上下禔穆而臣便論危事必難取信然試一念之假有蕩析以何策固安假有虛饑以何理振救脫致窺聞可任之將謂誰倘合擅恣可防之奸有幾災異不驗國之福也苟或驗焉

陛下綏禦之術得不素具于未見之前哉敢請先言其要臣聞君以操柄爲重臣以奉命爲恭柄失則重者反輕命竊則恭者反僭伏惟陛下慎爵賞之權刑罰之典雖覽羣言一決宸慮無委成假借以啓貴近牽制之私書稱惟辟作福惟辟作威夫威福人主所以固大寶制兆人之至術也臣有作福作威則害於而家凶於而國古之王者亦何能使刑悉當罪賞皆稱功要之事出於君則納忠者有歸政出於臣則植私者必衆傳曰倒持太阿言柄之不可失也又曰吐珠必含言失之不可收也若夫後宮戚里祈恩乞賞者歲月不虛陛下

斷之而不聽以示至公內省黃門給事左右亦宜數加訓敕  
使其忠不出位此皆助陽抑陰之術也臣聞伯禹三王之長  
也逢辜引慝宣王成周之良也思患側身故能感徹神祇收  
還威怒回沴氣爲太和化方蹶爲中興陛下照覽古今至詳  
至熟然變眚日著中外暴聞而罪已之言不形於詔冊思患  
之慮不動於宸衷委遠天戒越月踰時而羣下亦皆緘口無  
言第見繆引緇黃晨經夕唄修不經之細事忽可憂之大變  
人且未信天胡可欺臣至愚至陋竊恐銷伏之未得其道也  
伏望陛下不以災之未應遂爲宴安不以歲之屢豐便忘荒



謹普詔百執各貢所懷庶幾天下條貫粲然先見臣粗舉六  
事以裨萬一聯寫於左如有可採續當條陳科別惟陛下裁  
赦其罪姑垂省閱臣無任警狂待罪之至  
宋景祐四年冬十二月龍圖閣直學士宋祁表

教坊致語

臣聞璿杓東指披寶典以開年玉節南馳重懽鄰而講好國  
美春臺之享朝推宴俎之慈用洽樂康式昭熙盛恭惟皇帝  
陛下紹承丕烈奄宅中邦坐黃屋以訓恭擁綠圖而進道五  
辰順理九扈告豐圓璧方琮並薦精純之祀巽風解雨交流

曠蕩之恩五刑則解網畫冠一尉則垂囊臥鼓鴻休紹至協  
氣翔臻屬歲朔之申儀加使華之修聘爰開廣殿胥慶佳辰  
黃人捧日以揚輝方丈移山而獻壽珍禽肅穆晬表顛叩瑞  
藻躍魚嘉鎬京之飲酒翠梧傾鳳應韶武之撻金式均蒙湛  
之仁溥詠叢雲之且臣濫巾法部屢進神庭切忭亨期敢進  
口號千官星拱侍凝旒紫殿餘寒已暗收日湛露華陪宴席  
天回春色遍皇州雲韶三闕翔朱鷺錦幕千層舞翠虬拭玉  
鄰邦通使節萬齡享會慶洪猷

宋慶歷元年二月既望翰林學士兼侍讀宋祁表

賀南郊大赦表

帝儀訖享朝渙推慈諸駟飛傳庶邦叢慶竊惟天郊之重國  
制有常萬乘躬行三期備舉不煩不怠由列聖以持循以妥  
以虔合諸神而哀對璿圖累盛縟禮勤修恭惟皇帝陛下纂  
大合華漑中布度抵金璧而勿寶率儉示人收霜雪之餘威  
措刑於下克勵明德格於皇穹交薰太和冒我羣品顧懷時  
億瑞應日來亟歲上儀若祇舊典戒期百執頒詔萬邦曳雲  
罕之常羊服翠虬之半漢殊庭一獻清祐遍躋遂自陽靈之  
宮往會天元之日羽旄四合垓陞參登上璧左琮之華合祛



而信祝祖蒞宗題之次更侑而迪嘗拜嘉祚於席垂烈欽柴  
於雲表靈心合答熙典備成然後還坐中天之闈普肆隨風  
之澤改頌大號崇貫初元昭神之祥祈命惟永賞功赦罪已  
責逮瘵咸樂惟新牖民衷而遷善聿懷多福道帝祉以綿區  
盛際有光彝倫咸賴臣嚮觀舊史殫見往朝或不愛牲玉爲  
恭殊非明薦或所過祖賦爲復蓋出重勞語昔罕全訂今絕  
擬所恨清塵在望自苦周南之畱紫橐仍持不與甘泉之從  
第班恩論均泐懽悰

宋慶元元年冬十一月判審院兼侍讀學士宋祁表

謝換龍圖閣表對其文不出中國  
停直複門徒恩層閣本緣親而自乞蒙引籍以對除揆寵兼  
常無顏容愧竊惟先聖有作叢構實興鬱律宸居之嚴鑿積  
霧圖之廣踵華創職稱是取材肇允榮途何嘗輕授伏念臣  
識局庸淺術學膚孱入忝玉堂間倍講殿徒以樸忠無飾孤  
耿自將附湜湜于涇清守嚶嚶于雨晦賴天燾煦曠日保全  
適以臣冗庠召自外藩復參大政理所宜避地不處嫌稽首  
請聞訴言叙懇丐上還於禁籍得專侍於經帷伏蒙皇帝陛  
下見謂由衷特從換秩罷茲要近處以清閑拂怡儼之塵容

陰螻蝓之寶宇况臣出入三歲便蕃五遷四叨學士之名罕  
見從官之比雖素顏焦禿病幹疔癰器極斗筲之容利止鉛  
刀之割尚當勉懦爲立續短俾長倘有補於涓銖實不忘於  
隕踣

宋慶歷五年正月龍圖學士宋祁表

請復唐馱幕之制

臣聞唐時出師用兵每什部爲伍馱法牛馬任從所便其用  
隨行什物鍋幕之類皆具故行師萬里經亘歲月無所闕乏  
自五代之亂更相侵擾其兵不出中國弱者輕賚強者因糧



遂失伍馱之法今相仍不復尋討臣伏見朝廷之制每指揮  
五百人指揮使得夾幕一具副者得單幕一具馬軍得葉鍋  
布行槽等若干步軍得鍋若干自軍員以下更無帳幕或出  
次野外雖甚風雨亦無所庇又戰士被甲所將衣衾悉自負  
荷馬軍則孟杓之類悉在馬上然則行數百里雖人馬強力  
者皆已疲乏脫若逢賊安能挽踢擊刺與爭勝負哉故無幕  
帟則士卒無所休庇無馱物則士卒自須負荷此于軍戎亦  
非小害也臣乞詔邊臣檢求唐馱幕之法下殿前馬步軍司  
議可復與否條別利害上稟朝廷以俟指揮

宋皇祐四年春二月前禮部侍郎徙知定州宋祁表

乘小謝加端明殿學士表

乘塞無狀增秩有榮錫與侑頒心顏交靳伏念臣才非拔俗  
仕偶逢時脩內朝臣十有六載學不足以膺天子之問文無  
以代王者之言遂圖外遷冀云少補惟定武一道直契丹右  
延咸平以來號勁兵處自夏竦分建四帥韓琦始領九州節  
制中軍部分諸將琦既進律臣實代居以一介懦儒當萬夫  
重任義難辭劇奮靡顧愚然臣所習者藝文未曉者軍旅用  
非所習雖勤而勿效責于未曉故技有必窮用自再募居無

底績在法云殿惟黜是宜敢謂皇帝陛下憫久戍之勞排彼  
譖之侈雖遠猶錄謂拙可矜收雲閣之故資著丹殿之新籍  
仍秩經省未易守藩叢沓徽章夸媿鄙邑重降嚴旨切却讓  
封臣亦內揆愚心旁諭公議若循禮疊請則恐涉不誠或固  
節還恩又似規早罷不有粗使誰扞邊疆例格除音孰尊寵  
數輒昧涯分祇服器名日三省以自營身九殞而奚報但臣  
所念者邊務至重虜詐益滋得人失人係今日之輕重知己  
知彼爲天下之安危而有司特用苛法相挺守臣類以生事  
爲戒封堠畏怯不敢搖手倉廩虛乏正可寒心建明累上而



山陰江表... 卷之二  
朝省未從姑息小虧則謗囂立至况臣衰晏素自蠢冥判無  
成功徒忝休命望審擇於豪俊俾臨統于方隅設張遠謀羈  
制驕狄因罄敷於感臆竊附列於瞽言朔壘地卑君門天阻  
被符蠲謁攬綬知榮

宋至和二年春正月端明殿學士宋祁表

讓加承旨表

右臣今月二十二日閣門降到誥勅各一道授臣翰林學士  
承旨依前兼端明殿學士翰林侍讀學士者聞命震驚撫躬  
愧汗伏念臣病求解郡恩許還朝獲便醫藥之良以救桑榆

之晚是爲再造舉戴深仁然自休偃於私居尚苦纏綿於舊  
疹保虞盈滿遂致顛隳今茲詔除尤出望外且承密旨者或  
膺疾名或訪欲謀法從翠華之嚴恭持紫橐之重必資該敏  
仰副眷求如臣者年事頽侵氣力衰耗且責於必不能者敗  
加所不宜授者僭實累公議致速身災自知甚明人言將至  
伏望皇帝陛下推雲戢雷破節延光許回誤恩少安危悃誓  
堅九殞歸謝鴻私

宋嘉祐五年端明殿學士宋祁表

謝贈父宗年戶部員外郎大中大夫表

綸旨渙頒許臣僚榮及其親者忝緣慶隆太上皇帝聖壽之所推也寵降自天仰酬無地臣敷謬膺錫爵幸際會于風雲祿以養親復漑沾於雨露顯親固人子無涯之念推榮乃朝廷莫大之恩開壽域於普天納耆年於化景蓋由睿聖皇帝陛下孝心不匱溥爲錫類之仁慶澤旁流丕顯成人之美自非至治之世曷克由然夫豈小康之時乃能覩此賞其懋矣臣無懋德之可慙體極優哉臣冒優儀之莫旣謂天至廣君恩天之不可勝窮謂淵至深君恩淵之詎容易測况臣之父向嘗錫履於仕途逮臣之時疊受冠裳于贈典徒冒罔益感



在銘心補報有時分當隕首

宋隆興二年三月既望戶部員外郎大中大夫宋敷表

稽惟我朝之世... 有守謙夫... 所據... 庶事... 宜盡... 屬什... 取正... 臣等... 奏疏

試冊

皇帝神武頌

恭惟皇初之世不賞而勸不伐而威夫豈簡冊之彌文哉蓋  
有未識夫震耀之飭天刑剛健之奮乾體也聖人制海內之  
命據天位之尊總攬權綱章叙典憲不有威辟不足以懲元  
愆不有變容不足以開至聖用能消弭殄行嘉靖多方丕聞  
皇靈嘉顯宗軌者也皇宋在宥列聖繼統際天丕冒亘地砥  
屬仆威械以去殺襲道樞以訓儉恩裕宏暢容典飭畫萬寶  
取足合祛於皇極百靈隕祉震動於珍物然猶右賢左戚均

權布寵百辟箴闕內平而外成五細在邊番休而遞上檢防  
來患蠲滌多辟懃懃懇懇非弭亂之謂歟然而善制未能無  
弊有憂所以固國迺者先帝違豫羣邪濟凶寄朝家之威藉  
鈞宰之貴侔尚方以制器狎神巫而締紱及至易守帥以漸  
醜圖徙陵兆而投天隙拂戾蜚語恬有奸計遂欲包禍心以  
竊發執左道而干紀餌梟羹以未盡礪豺牙而密噬神靈震  
赫奸宄呈露輔臣建白醜黨震壞赤車具獄而來上凶豎伏  
鎖而前死允恭事敗先謂伏誅皇帝陛下深拱諒闇照覽前  
典重當國之職慎退人之理詔曰冢宰之任萬樞所繫今丞



相謂自底不令其上大司徒印綬於是三事百執抗疏以請  
曰無將必誅列辟經制與衆共棄常苦無赦謂今所犯惡不  
可聞願龔天刑以塞羣議帝曰朕不忍致於理其效於朱厓  
然後起跣弛之臣明枉結之獄掊尅之貨附上於官附麗之  
黨肆赦一解漏鯨彗於綱目摧虎吻於市道浴白日以升景  
投紫蜺而霽氛惡草絕而善苗興清風翔而羣陰伏人靈舒  
憤道路騰歡旣而縉紳之徒相與喟然並稱曰前者末命微  
梗孽臣乘間潛搆不類陰傾時柄食黠靡化指莠待滅陛下  
深覩時變先斷宸衷倚文母之聖攬列辟之議廉考臯殄介

不終日末減澄洗蕩無餘災定寶業極南山之安穢巨魁易  
家人之召智不回慮惡未旋踵事已決矣昔滔天殛而虞功  
劭流言放而周德昌觀闕誅而孔制列寶瑟僵而漢基永撥  
亂之盛準長世之懿謨其所由來舊矣蓋烈祖二宗墾蓄除  
害蕭勺衆慝若彼之艱也太后聖上建威銷萌祇適先訓如  
此之脩也宜乎勵無前之景鑠暢不殺之神武正春秋謹始  
之制釋洪範作威之害開賜無疆之眉壽摛著不朽之鴻休  
此其時矣下臣佞末品不足絃次新頌輒敢述輿人之詠  
簡康衢之詩亦擊壤折楊之比爾其辭曰

眞宗御天休息羣元委裘上仙茂功全兮皇帝纘務惟新百  
度尚文右武鴻基固兮孽豎柄臣矜權取勛與妖放命托機  
神兮上公列辟協忠宣力摧凶殄惡清君側兮曰恭曰謂銜  
刀投裔神武不殺退以禮兮或附或離橫貸敷施脅從罔治  
董之威兮氛開禋收美澤雲遊荷天鴻休德旣優兮昭雪忠  
良輿頌風翔寅威舊章錫無疆兮  
宋天聖四年秋八月雍邱庠生宋祁撰  
若夫天地之區旣奧而腴王者所以作京焉神明之奧匪攻

山陰江表傳曰世壽  
而築上帝所以定位焉我朝之擁歸運也譏函鎬保界之陋  
鄙周維淳潛之淵乃據梁之芒芒偵河之渾渾晝邦畿之千  
里於以宅天子之尊然後翼翼乾乾作邦乎先禘其祖之所  
自出遂有事乎昊天占國內之七里得高邱之崛然自乾寓  
之初闢保坤靈而不遷藏偉兆于遐葉震元符於茲年此烈  
祖所以裒神之對神宗所以旅物之蠲真考之所陟降丕后  
之所周旋藹列聖以烝衍揔萬靈而賓筵念降監之厚福焯  
巍巍而亡原則晉考卜乎委粟漢胙蠻乎甘泉曾不得望我  
之末光絕爰况並驅而齊肩哉敢問圓丘之狀也其何如焉



廣矣大矣畧可詳矣上崔嵬以鬱律兮外博厥而神麗遡朱  
鳥以高蟠兮槩瑤魁而袤峙將休氣回復乎其椒兮榮泉滋  
滲乎其趾魑魅不若泯伏於其遠兮神明肅然離衍乎其邇  
於是攘之辟之其蓄其翳修之平之其炊其噉上三陔以積  
高外四門而疏陞列道糊頰重營界紫無縮板以作勞不藉  
屬而昭侈固天質之自然非人力之攸致萃兮似高山之在  
周邦截焉若隆臚之亘汾澗及夫涓日肇祀於郊之宮陶匏  
尚質金石有容璧奠縟以蒼蒼兮鼎歆雲而隆隆百神服食  
蔓延乎坎間兮有司守燎燦爛乎壝中穆穆天子相維辟公

咸盛氣以疆力相升降乎穹崇披大紫之莫莫招翠黃之雍  
雍合蕭薌于欽柴曳高烟乎璇穹塞天淵以隕址奮光明於  
亡窮峻乎已事罔不有恭若乃自內出者無匹不行自外至  
者無主不止故我率乎祖而推本正乎位而升配使禮動乎  
上則神享樂交乎下則人悅畢九州以獻力罄一純以盡意  
君子曰觀天下之物無以稱其德所以因天事天取至誠以  
爲貴則斯丘也誠國家集福之清場事神之寶時國聽之所  
憑厚靈心之所翔會駐魄寶于颯歛賁皇圖之方志彼草摟  
列仙之館像設梵王之廬豚蹄種祀之托鱗長九淵之居皆

祀官之細祠族之餘尚且落成者鼓吻而極嘆乞靈者舐筆  
而爭書叛宣父以語怪溺邱明之好巫獨圓丘歸而遺美甯  
儒者佞儷而末之思歎遂作頌曰屹圓壇赫昉昉大盤盤兮  
君之升帝是饗輦而安兮福無違禍不回委如山兮聖繼聖  
萬斯年長監觀兮率典與文蔚然而舉水陸魚鼈固燿燿  
宋嘉祐八年八月望後日南省進士宋祁撰表而兼聖憲文  
浙省水利策辭皆出蘇文忠公以盡西古學今文林而  
國家立法以惠民也永萬世之利有經常不易之制紆一時  
之急有圓神通變之方制曰經常非以襲故也謂將垂之萬

世而可以興其利於無窮也哉變曰圓神非以多事也謂將施之一時而可以弭其害於不測者也酌利害以制其宜審經權以達其用則權行化裁之術有以盡酌古準今之施而民患可除天災可殄地利淪疏之勢可以順達而無壅塞之虞矣執事目擊樵李吳興之潦沒而舉水利爲問茲固勤卹民隱之心也敢不悉所知以籌之乎夫水利何由而始也蓋自洪水橫流于中國而神禹治之浚溝澮以距川決江河以注海捍患之中當寓乎興利術而水利之說於是乎肇端矣然而其法猶未之脩也及井田遂人之法行而一井有洫一



成有澮一同有溝或以均水或以止水或以蕩水蓄洩咸得其宜而旱澇兼有所備水利之法于是乎益詳矣夫一同之地其膏腴宜田之所凡幾畝也其爲八口百畝之授凡幾人也周人不計其地之入不計其人之產而溝塗封洫無一不爲之備者此豈無故而然哉凡以制之所繫之者大而遠足以遺萬世之利近足以紓一時之急莫不由於斯也自後井田廢阡陌開民資乎稼穡者日多則田之灌溉于水澤者益急田之灌溉於水利旣切則上之講求乎治水者益詳叔敖之起勾陂太公之穿腴口充國之架橋梁十有一信臣之治

陂塘其經不必其皆同而要皆足國裕民之至計也矧我兩浙之地土饒稼穡之所產其地卑濕水流之所鍾也產以稼穡其爲利也固大而鍾以水澤其爲害也亦危天時之旱雨潦一集可浮苴棲於木末生民淪於魚鼈矣邇者嘉湖明越之患凡存心於民隱者莫不蹙額而痛心水利之政所當講求者可不汲汲也哉議者咸謂不障其患則其利不興此固必然之勢無足言者愚則以爲利不可以遽興也故欲興其利者因先賢已成之蹟則萬世之制當立矣患不可以遽除也相其水勢趨流之故道而爲一時之變通可也時有古今

地無先後先賢之經畫莫非後世之楷模也哉浙西之地白居易之治杭浚靈濟以溉田矣李陽冰之治海鹽修舊堰以瀉水矣浙東之地馬臻之創鑑湖而田有灌溉矣陳堯佐之開陡壘而水有疏濬矣他如胡公塘魯公坡蘇公堤錢王之捍海濤也李泌之引湖水也成蹟雖湮而遺址猶有存者苟能因之以經理而永賴不易之制財用少而成功將百倍矣由是因時而制宜相地以導利勢逼于太湖者則引之注于湖勢逼于三江者則引之注於江壅者可開則棄宮室以爲汴池弗卹也障者可闢則棄田囿以爲沛澤弗計也化而裁

之與時宜之圓神不滯一時之經濟可以殺滔天之橫流矣  
兼此二者而又擇其能辦事之人任之使不阻於權貴不限  
於速功治人治法之兼資而兩浙塗炭淪胥之民其轉而置  
衽席之上矣若曰天數之適然而不可以易爲地勢之傾險  
而不可以易作惟玩愒坐困而已焉則非愚生之所敢知也  
惟執事進而教之幸甚

明嘉靖四十年辛酉浙省鄉試中式舉人宋景星

擬平緬甸賀表

朱撫臺觀風一名

之

伏以天下之勢離必合聖人出而東西南北咸瞻斗極於幽



燕帝王之師殺以生神武昭而龍虎風雲大奮雷霆於滇黔  
穢厥廿載寇六宇咸被衽席之安救此一方民異域初慰雲  
霓之望興歌虎士喜動龍顏臣等誠懼誠忭稽首頓首上言  
竊惟夏禹徂征有苗來七旬之格周文整旅崇侯成三載之  
誅登祁連之臺風高麟閣遊玉門之寨威憚虎頭馮將軍再  
戰而底績殺函易衣燿火裴節度三推而功成淮右盪雪鵝  
羣惟丈人得算師中斯王靈遐暢海外南巢之放成湯有來  
蘇之望太白之懸周武有篋筐之迎子嬰授首漢祖入關而  
約法三章楊廣自刎唐宗得國而君臣一心乃者明季失御

元元塗炭伏遇

皇帝

陛下敦敏性成岐嶷天縱乃聖乃神乃武乃文邁唐堯之弱  
冠有馮有翼有孝有德過周辟之冲齡徽音開太任之齋後  
史前巫已隆諭教於襁褓赤舄廣公孫之德左周右召更翼  
師傅于綉裳固將八荒爲家豈使一夫掉臂於是我武維揚  
王赫斯怒爰命平西王聲罪致討更命定西將軍協力進征  
權專幕府囚獻頌宮整聖王仁義之兵鳴鏡吹角何妨後舞  
前呼出武侯節制之師秣馬洗兵不啻左于右羽長安全復  
已破封豕之巢西蜀長驅遂窮狡兔之窟色飛露布威靈訖

銅柱之鄉武震延推謳歌出玉關之外覩郵寄以神飛帝曰  
親臣之力也敢忘闢地功高開凱函而色動臣曰皇上之靈  
也實本開天畧遠敢不上告天地大告祖宗樂備禮明適治  
定功成之候執俘獻馘重水源木本之思奏笙歌以佑享省  
滌惟虔集圭璧以奔趨鼓舞皆舉頒示中外使百姓知朝庭  
之籌度播聞四方使天下嘆天子之德威臣等長纓願請細  
柳空懷得我師之捷音饒歌欲作聆緬甸之盛事綵筆難宣  
附虎拜以揚休攀龍鱗以瀝悃伏願宏恢帝網式廓皇猷聖  
學進以就將洽體隆于熙皞功成七德敢因臥鼓而議銷兵



道序九疇宜借外甯而深內懼勸農政以職萬民無忘豳風  
七月之篇修文治以洽四國務矢周禮三謨之典奠安玉版  
鞏固金湯無若晉志遂懈於平吳當如漢治益勤於破楚鐘  
簾有永聖壽無疆矣臣等無任瞻天仰聖踴躍懼忭之至謹  
奉表稱賀以聞

康熙元年

山陰江頭宋氏世譜卷二



山陰江頭宋氏世譜卷三

二祭規

元旦首

元旦祠祭定以巳初值年者豫先洒埽祠宇整潔几筵將祭

品杯箸按照祭簿敬謹陳設

辰正初鼓 頭炮催齊

巳初二鼓 二炮開祭

主祭及與祭子姓皆肅容盛服辰刻詣祠恭候二鼓

儀注鳴贊

行祠祭禮 奏樂 樂止 主祭孫就位 與祭孫皆就位

參祠 跪 叩首 叩首 三叩首 興 主祭孫詣香案

前跪 與祭孫皆跪 初上香 降神 初獻爵 獻箸

獻肴 獻時食 興 復位 跪 叩首 叩首 六叩首

興 主祭孫詣香案前跪 與祭孫皆跪 亞上香 亞獻

爵 獻饌 獻牲 獻果品 興 復位 跪 叩首 叩

首 九叩首 興 主祭孫詣香案前跪 與祭孫皆跪

三上香 三獻爵 獻羹 獻麵食 獻湯 獻棗盛 獻

祝帛 衆皆俯伏 執事者跪讀祝文 執事者舉罍斟酒

脩食日樂止 俯伏者皆興會 焚帛 望燎 奠爵 禮畢

長幼公揖 祭畢燬酒不獻拳行令

春秋二分 春秋二分

春秋祠祭定以午初值年者豫先洒埽祠宇整潔几筵將祭

品杯箸按照祭簿敬謹陳設

巳正初鼓 頭炮催齊

午初二鼓 二炮開祭

主祭及與祭子姓皆肅容盛服已刻詣祠恭候二鼓儀注

如元旦禮祭畢燕飲不猜拳行令



清明 飭祭畢燕會不飲茶酒

清明掃墓值年者按照祭簿敬謹備辦凡屬子姓臨祭著素  
袷半祀后土吉服以官職最尊者主祭如本員在任或在籍  
有故不到值年者邀他員代獻儀注鳴費用一總三獻禮祭  
畢飲酒不猜拳行令

春祭忌辰祭安以中博節中書新共西報師中聲驚只恐祭

懸神像 供神牌或以木書或以紙寫值年者按照祭簿敬謹備辦子

姓臨祭著素袷祭畢飲酒不猜拳行令

是日忌嫁娶不慶賀不宴會不聽樂不觀劇



祭文禮考並國三合之於芝蘭野香然盛華石之

書禮元且是六世之孫甲暨登

裔孫汝楫撰

年昧維十二年歲次平章

朔越

日裔孫某等謹以

牲醴庶羞之儀致祭於

始祖 考唐戶部侍郎兼山南東道採訪使道翁府君  
妣 誥封夫人 劉太夫人

七世祖 考宋贈平章秦國公任荆南節度推官復古府君  
妣 王太夫人 高太夫人 王太夫人 鍾太夫人

朱太夫人

八世祖 考宋贈少師在工部尚書翰林學士承旨景文府君  
妣 誥封一品夫人 劉太夫人

遷江始祖 考宋處士太菴府君  
妣 沈太安人暨

闔廟昭穆宗親之座前曰伏以本深末茂澤厚流光繫  
太祖功宗德之昭垂斯子繼孫承而勿替敢忘其所自始不

追其所由生耶惟我

烈祖肇崇構於廣平沿璇源於汴水扈蹕從龍而渡浙畫屏

中雀以遷柯追溯

前徽在人能述聿稽世德更僕難終

宰相賦梅十三傳而平章繼起

尚書歌杏五六世之科甲連登

棣萼聯芳並列三台之位芝蘭擢秀幾盈萬石之楮牙笏



滿牀金章奕葉推恩榮以三代均沐封公頒卹典於兩  
朝頻邀賜諡代傳孝友無慚閥閭門風世守縹緗不愧  
縉紳家法鴻博領紫薇之薦

處士名高蟾宮分丹桂之香

廣文望重承

先猷之丕著宜後嗣之熾昌茲屆椒花獻頌之辰正逢柏  
酒稱觴之候璿杓東指披寶鑑以開年朱鳥南躔駕蒼  
龍而布朔欣陽春之有脚感雨露之旣濡撫良辰而倍

切思親覲



廟貌而稍申孺慕吉蠲為饎敢羞蘊藻之微明德惟馨用

告粢盛之潔千秋俎豆偕韶景以俱新百世雲祇與春

華而並茂伏祈 休奠 諸姑 寶 繼 以 開 平 未 島 南 觀 諸 蒼

昭格 之 丕 馨 育 錫 錫 之 錫 昌 茲 無 琳 亦 雋 歸 之 氣 玉 數 財

鑒此苾芬尚

饗 士 各 身 融 膏 辰 其 封 之 香

春分 禮 未 去 節 則 節 菜 蕪 之 蕪

伏以孝莫大乎饗親禮莫隆於脩廟

祖功宗德敢忘本始之所由子繼孫承用及 公 顯 神 典 然 雨

尊親而將意幽明殊路效萃聚以感通昭穆叙倫法震亨  
音而主器此明禮所以特著其典而至孝所以獨擅其能  
也惟我

烈祖承崇構於廣平沿璇源於汴水鶯遷東越扈南渡以從  
龍鵠起南湖臥東牀而士鳳公卿顯秩代有其賢閎閎  
名門世無其匹

宰相擅賦梅之筆勛冠唐賢

尚書樹歌杏之名才高宋世

兩朝耆舊膺台鼎以調羹

一代儒宗宰剡城而製錦

尚玉堂繼世應列宿於農曹

宰金部辭官歌攸芋於日鑄鴻博領紫薇之薦

處士名高蟾宮分丹桂之香

廣文望重代傳孝友克循架燹之昭垂世守縑緝竊幸淵

然淵源之弗墜茲當春色平分之際正值韶光明媚之辰看

寸草之敷榮感春暉之罔極恩光雖遠縈五內而常存

雨露既濡罄一純以盡意判羊執豕昭明德以薦馨擷

藻采蘋崇吉蠲而備物質在旁而臨在上一堂之



靈爽式憑儉然見而愾然聞歷代之

音容可接千秋俎豆偕時物以俱新百世本支與韶華而

並茂伏祈

昭格

幸鑒此苾芬尚安

饗

秋分

伏以祭先主孝脩廟以時木本水源不忘其所自始

祖功宗德敢忽其所由生體萃渙以饗親無患幽明之隔

昭吉蠲而致敬可羞蘊藻之微此祀典所以著明禮而  
闕宮所以頌匪解也惟我

烈祖賦梅垂業紅杏流芳沿世澤於南湖振家聲於東越代

傳孝友無慚

宰相之門風世守縹緗不忝

尚書之家法累仁種德滋瓜瓞之縣延積善餘慶致椒聊之  
蕃衍鴻博領紫薇之薦

節高潁水以潛魚蟾宮分丹桂之香  
祥集講堂而飛鱣知賴



先猷之不著獲邀後嗣之熾昌茲當秋色平分正值清光  
徧滿霜露既降悽愴感君子之心倉庾既盈楚茨致孝  
五世孫之慶罄一純以盡意薦百物以奉嘗俎豆馨香潛襲  
四世木犀之馥衣冠華美遙分霜葉之紅如見如聞歷代之  
三音容可接在旁在上一堂之

二靈爽式憑惟祈

其人

敬鑒此苾芬庶或受茲介福尚

饗

東麓墓祭



維 年歲次 月 朔越 日裔孫某等謹以

牲醴庶羞之儀致祭於

始祖 考太菴府君 妣沈太安人

二世祖 考定齋府君 妣俞太孺人

三世祖 考允芳府君 妣周太孺人

四世祖 考文學府君 妣方太孺人

五世祖 考梅庄府君 妣強太孺人 之墓前曰清明節屆景物頻更推本溯

源繫緬 爲酒 朝野 創 烈 甚 千 女 以 會 爽 雅 盛 焚 焚 煙 華

遷江之澤因時致祭用脩掃墓之儀黃土一邱埋誌銘分

五世蒼苔萬點護碑碣兮千年爛柯山麓之間敬將芬

苾榆柳火新之候瞻拜松楸惟祈

廕庇遙孫百世之簪纓勿替將見紹承

前烈千秋之勳業彌彰尚

饗令即甄祭烈燭令觀拜奉於豆令奠用吉吉醴令

項里墓祭 齊土令濕自醴無土一林令盡意三

維 年歲次 月 朔越 日裔孫 某等謹以

牲醴庶羞之儀致祭於

六世祖 考宣召府君 妣沈太孺人 之墓前曰嗚乎禁煙節屆兮天朗氣清

六世豔陽物換兮柳暗花明追維千葉聖朝國香天賜康寧

祖考兮窆彼金陵繫惟

祖妣兮居此佳城如見如聞兮

靈其昭格在旁在上兮感自精誠土一抔兮盡意禮三獻

兮明禮望松楸兮瞻拜奉俎豆兮虔陳用告吉蠲兮敬

以妥而以侑

鑒茲微悃兮庶來格而來歆尚

饗

以上兩處 先塋前後江頭所共各有祭產各自拜埽



向有定期後江頭定於清明前三日前江頭定於清明

前兩日

去郡山墓祭

維 年歲次 月 朔越 日裔孫 某 等謹以

牲醴庶羞之儀致祭於 豆 羹 刺 脯 山 景 祖 之 園 外 塚

七世祖 考養菴府君 妣王太孺人

八世祖 考景齊府君 妣朱太孺人

三春 考景南府君 妣沈太孺人

考景恒府君 妣蔣太孺人

考景馨府君妣鮑太孺人之墓前曰伏以節屆清明律周新火

三春將暮百物用昌寸草春暉追念

恩勤而莫報白楊夜雨堪嗟窀穸之長昏聽杜宇之聲倍

增淒楚望松楸之蔭彌切思成率諸裔而共將罄一純

以致敬雨露既濡之候俎豆虔陳湖山最勝之區衣冠

肅拜惟冀

先靈昭格享此苾芬庶幾後嗣蒙庥受茲介福尚

饗

詣兩日

型塘墓祭

與於山館安於清明前二日前以親安於



維 年歲次 月 朔越 日裔孫某等謹以

牲醴庶羞之儀致祭於

九世祖考順甯府君

九世祖妣

孫太孺人 張太孺人

十世祖考裕菴府君

十世祖妣

尹太孺人 潘太孺人

十世叔祖考敦莽府君

十世叔祖妣

傅太孺人 俞太孺人

十世

壽太孺人



十世祖考本清府君 妣蔣太孺人之墓前曰伏以時值禁煙律周新火

十感光陰之遞嬗每誦

先芬當雨露之既濡用思孝享采蘋擷藻向邱壟兮薦羞

十剪棘除荆望松楸而瞻拜惟冀

鑒茲芬苾千秋之俎豆常新更祈

十蔭出秀靈百世之簪纓勿替云爾尚

大饗

河塔墓祭文辭

副貢沈王臣 代撰

維 年歲次 月 朔越 日裔孫某等謹以

牲醴庶羞之儀致祭於

十一世祖

考東塗府君  
妣馬太孺人

之墓前曰嗚乎山高水長述德懷客

兒之詠秋霜春露悽愴感君子之心蓋寸草春暉最動  
念几筵之側而白楊夜雨尤感懷墟墓之間惟我

祖考生前令德夙傳軒鳳之英身後佳城宜卜眠牛之吉梅  
岑擁護竒專萬壑千巖賀鑑彎環雄擅三山九水知地  
靈斷由人傑而裕後藉以光先茲當序屆清明風光漸  
霽好律週新火品物咸亨碧草叢時虔陳俎豆蒼松蓋下  
展拜衣冠樂諧流水之音敬以妥而以侑禮比豔陽之

節庶來格而來歆尚  
饗孫特國海大品

大鳴墓祭 汝楫撰

維 朔越 日裔孫 某等敬以

牲醴庶羞之儀致祭於

十二世祖 考近郊府君 妣傅太孺人

十三世祖考南阡府君

十三世祖妣 趙太孺人 魏太孺人 之墓前曰伏以孝莫大乎享親德

莫隆於追遠反其所自始木有本而水有源推其所由



生祖有功而宗有德此古人特著明禋之典而後世衍  
爲墓祭之風也惟我

祖考蒙賦梅之業傳紅杏之芳沿世澤於江頭振家聲於鑑  
曲生前令德更僕難終身後嘉名在人能述所憾

音容莫接馬鬣永封惟叨

蔭庇孔長牛眠有慶椒聊蕃衍洵邀陰隲於天蘭玉挺生  
允荷效靈於地茲屆禁煙令節正逢寒食良辰湖色山  
光一時俱麗石泉榆火萬象皆新當雨露之感人情殷  
孺慕看春暉之育物念切報恩黃土傷心添一杯之土

蒼松慘目掃三徑之松如見如聞誠感

先靈之格在旁在上虔申孝享之忱俎豆馨香粢盛豐潔

惟冀

鑒茲芬苾庶幾受福靡涯尚

饗

上墟墓祭

維知年歲次 杏月 朔越 日裔孫 某等謹以

牲醴庶羞之儀致祭於

十三世祖妣趙太孺人暨

十五世祖妣陸氏孺人之墓前曰清明節屆物候頻遷緬

淑範之昭垂永懷

遺硯悵

慈暉之寢遠莫報

含飴徒深李密之情常凜江蕤之戒雨露濡而增感藻蘋

潔以輸誠墟墓之間禮隆三獻松楸之下土覆一抔

鑒此苾芬伏惟尚

饗

以上四先塋皆前江頭分支郡山拜埽定清明日型塘



山陰江氏外上七言  
定清明後一日其餘隨時擇吉

掃墓祀土

維 年歲次 月 朔越 日信官宋某昭告

於

某某后土尊神之座前曰伏以坤元厚載地利永貞

位極中央繫資生乎萬物祀崇元日重保障於一方惟我

先人於斯卜吉仰

神護佑向後彌昌今將奠醑於塋先肅明禋於社有牲載俎

有酒盈壚

鑒此苾芬伏惟尚

饗

譜成告廟

繫

祖考之精神非祠奚聚而宗親之支派非譜何稽吾家世譜  
本自日鑄節經脩緝踵事增華仰

先人之典則具在簡編俾後世之雲仍足資儀式惟自嘉  
慶十七年閒纂脩以來又閱兩世丁添無算人有足傳  
續脩之舉誠不容遲今自辛酉之春設館興脩聿至重  
陽管城事畢速矣哉是役也採訪使泛舟一葉較輕駕  
輜之車操觚者刻燭三更不輟史文之筆一家文獻廣



厥搜羅百世規模增其式廓刪繁蕪以就簡補疏漏以  
 備全文成十萬有奇卷分二十有四草藁甫脫黎棗旋  
 登校對無訛裝潢成帙謹涓吉日式貢新編有酒盈尊  
 有牲載俎伏祈

昭格鑒此精誠世世蒙

庥永保貞固尚

饗

繫

繫

贈言

楚江秋夜懷宋文光

寇準

西風生遠水瀟颯度吟臺  
明月夜還滿故人秋不來  
寒蛩啼暗壁散露下蒼苔  
此夜空江上令人首重回

東閣雨中呈宋平章

歐陽修

直閣時分暇幽懷坐獨哦  
綠苔人跡少黃葉雨聲多  
雲度愁陰散風傳禁漏過  
瑤圖重嗣聖玉色久包戈  
相府鹽梅重豐年氣候和  
昇平無限樂農野聽謳歌  
奉荅西掖諸學士宋子京寄韻  
蘇軾



雙猊盤礎龍纏棟金井轆轤鳴曉甕小殿垂簾碧玉鈎  
大宛立仗朱絲鞚羨君意氣坐風生落筆縱橫盤走汞  
上樽明日寫黃封賜茗當時開小鳳閉門憐我老太玄  
給札看君試雲夢豈惟蹇步倦追攀詩筒深愧勞傳送  
春還宮柳逞腰肢雨入御溝鱗甲動借君妙語發春容  
顧我風琴不成弄

賦姑熟八咏送宋孝廉叔韞氏歸山陰

牛渚春濤

凌玉機

雨添新漲蕩春溫飄泊桃花到海門噴雪乍疑呈水怪



湧雲俄見出江豚逆衝磯岸聲如吼順送帆檣勢若奔  
莫問燃犀靈異事且停歸棹倒金樽  
龍山秋色

龍山風景近秋佳霜葉千林映菊花氣勢直凌霄漢遠  
翠微遙接海門賒遊排檠戟懷司馬醉落烏紗笑孟嘉  
歸去鏡湖當此節落霞孤鶩望天涯  
太白遺事

采石江頭月色多謫仙從此縱酣歌百年詩骨埋黃土  
千載殘碑擁綠蘿化鶴不聞歸塚樹騎鯨誰見出江波

與君吊古重增感他日登臨候再過  
謝公古井  
高人佳遯尚留名石甕依然歲屢更  
倒浸碧梧樓鳳影  
冷藏明月古蟾精味同揚子江心美  
泉迸龍山地脈清  
聽轉轆轤聲不絕此君與我別離情  
凌歊夕照  
層臺突兀聳蒼穹宋武荒基委露叢  
色映峯巒疎雨外  
影留松柏淡烟中溪頭客醉停遊騎  
江上漁歸泊釣篷  
登覽不堪攜手別落霞飛鳥思無窮



丹竈寒烟煖  
石苔無火碧  
苔封曾就丹砂九轉功  
仙骨已輕飄  
馭遠遺踪猶在煉壇空  
風清古樹來秋鶴  
月冷幽巖吐夜虹  
歸到月山翹首望  
尚疑雲際鬱龍葱

白苧松風

一帶蜿蜒繞古城  
幾重蒼翠翳雲屏  
鬢髮細葉龍翻鬣  
搖曳危枝鶴墮翎  
忽訝春濤生碧澗  
還疑仙籟起青冥  
希音頓覺清塵耳  
遲爾還來石上聽

尼坡梅月

謝



幽葩幾樹碧溪邊  
深夜稍頭一鏡懸  
冷浸瑤肌同瑩澈  
淨涵秋質共嬋娟  
廣寒似降霓裳侶  
姑射俄逢玉佩仙  
歸客忽驚詩夢斷  
數聲漁笛起寒烟

八咏總題走筆賦

夏集雲騰

君莫復我以行路難  
我當渡潼江泊灑  
瀕膽驚魄散  
今安然君莫復我以人心艱  
我昔結羣英交俗客  
翻手覆手風雨今滿天  
丈夫出門天地濶  
泰山一任遠與桐柏  
王屋之草木相勾連  
我懷如蕩空中烟  
君今下錢清離  
禹穴去曹娥遠鏡湖別柯亭  
而來覽圻甸之山川  
放舟

燃犀渚龍鼉喫鼠百怪白石顛解鞍落帽弔古坐山巔  
人情去處險且事鍾山泉載弔李夜郎文章思如海倒  
懸大呼陽侯出海去世間從此無謫仙載過謝公宅古  
井殘陽前淮西舊政不可勒到此誰復爲詩憐笑問尼  
坡梅一節金玉堅鬼面鐵圈線勝彼西湖妍醉舞白苧  
松欲和白苧篇明當賦歸去著此白苧聯牽衣涉仙跡  
丹竈名還傳欲學長生術白日不我延此時君應一回  
首凌歊臺下還停鞭三千歌舞尚如此此身何事來天  
邊拂衣便賦故山隱龍湫虎穴徒奔騫行路難劍閣雲

山陰江表上七言  
棧難與肩人心艱春秋逆賦匪昔年路難君莫行心艱  
君莫托一寸如紙常平平從渠五霸三晉豪傑名自鐫  
且歸去越山越水賞亦便從茲不受王門權到家細與  
故人說唐虞之世多直賢江湖之險不足數鶴書豈爲  
君才偏明當再渡巴陵山巴陵橋上看月圓  
拉宋味芹同後峯社會  
牛首之峯叢桂林千巖盤護翠雲深石門高張日月下  
山麓斜連雲霧侵燕婉美人長在望蕭疎秋色轉難禁  
老懷憑語涓川叟共我携竿向碧潯



謝宋味芹臨西麓社祀會

周沛

此日移文西麓苑昔年建禮後峯臺春秋禴祀隆瑤璧  
歲月江湖任草萊花徑漸繁三月曉竹林初籜七賢來  
白蓮移稿多餘興洛社賡歌愧不才

憶後峯嘉會寄示宋味芹

朱簾

詩社多風雅書囊富典墳清聲流石髓直氣掃烟氛  
北海雲龍象南山霧豹紋後峯遺址在草樹卽同文

味芹過訪後詩以見意

朱簾

喜得春風到草廬餘寒陡覺頓消除德星聚見賢人里

化日光生長者車詩麗烟霞紛象緯文源江漢煥圖書  
絕編忘味今三月尚病離羣與索居

頌味芹預營蘭窩

胡文成

天地盈虛有誰悟碌碌徒成千百蠹先生勘破死生關  
蟹窩預築溪雲暮梅花流水洞天小洞天扁春春不老  
不信牛山興感除西風滿地淒烟草

雪鶴軒賦

高廩

笛亭西里宋君孟夫清修雅素譬猶雪中之鶴因以  
自署結罟散人高廩爲之賦云

雲龍風虎之相從由其氣類之感通夫何雪鶴之配名取其  
晶潔之所同于時烈風屆候朔氣交升焦溪盡涸陽谷皆凝  
火井成凍溫泉生冰沸潭無漏炎風不興微霰先集密雪乃  
零始緣棟而冒薨漸積砌而盈庭竹垂銀葉樹綴瑤英盼野  
則萬頃布縞瞻山則千峯削璫偉胎化之仙禽卽還丹之上  
使厭汗澤之久居望清都而遠志態有遺妍貌無停趣喚遺  
響於璇階振修翰於氎毼朝連軒以景從暮宛轉而側侍意  
踟躕若故交情繾綣如宿契再訂歲寒之盟永謝樊籠之繫  
勿信讒以結權乃作歌而受記歌曰藹藹兮浮浮灑灑兮弈



山陰江氏夕上七言  
弈盈尺兮呈瑞豐年表丈兮表殄陰德方埽一境之瑤華欲  
會凌寒之嘉客適有丹哥來自赤壁炫霽色之晶瑩驚寒聲  
之浙瀝歌未竟癯然一翁衣敝履穿自稱東郭先生直入其  
座顧謂主人爲辭曰雪降鶴來鶴與雪會或聖其廬或掩其  
穢空茫纖塵添彼勝槩自今非青田之侶其勿邀非華亭之  
儔其勿待笑呼毛穎飽濡墨繪大書其楣題爲雪鶴之軒標  
雞羣鳧隊出蕭牆之外

雪鶴歌

昨宵飛夢登瑤臺水晶簾捲珠箔開天妃散花呈六出三山

一望迷蓬萊少焉見白鶴盤空飛下來鸞應鳳臆真上相龜  
背驚腹非凡胎墨塗睛丹染頂三尺還應詫長頸混濁甯蒙  
世俗塵清虛只戀壺天景我欲朝上清借爾作騏驥爾應謂  
我非列仙聳身臺前發長唳清聲一派傳十洲山鳴谷應風  
颼颼夢魂驚覺何處覓數椽茅屋掩溪頭冒寒起來披鶴氅  
客到聞敲竹門響見君豈是尋常人廣平諸孫夙所仰壯志  
固昂藏孤標尤灑落分明瑤臺上向所見雪鶴鷓鷯斥鷃徒  
紛紜迥然不與凡鳥羣衛公已矣不可作祿食華軒誰及君  
時聞此言殊不樂我生自是冲天物豈向侯門事棲泊試開

雪鶴卷爲作雪鶴歌我歌不解繼南飛奈爾雪鶴知音何雪  
鶴兮雪鶴我欲與爾終結托只恐天風振羽衣一旦翱翔謝  
塵壑當今天子正聖明奇祥異瑞來縱橫爾應相約九苞鳳  
共聽仙韶儀舜廷

雪鶴詩

車份

孤鶴橫江雪滿空眼前彷彿見清容應嫌人世樊籠窄  
歸去瑤臺十二重

又

沈玘

縞袂驚飛蕙帳空仙遊何處覓遐踪雪埋緱嶺天應老



雲黯瑤臺路莫通靜隄無聲翻竹露清宵有夢托松風  
獨憐無地畱瑤骨泣灑冰天血泪紅

又李東坡詩書以酒東人韻禽思不禁寒好李泉滂骨聲

憐君久作蠹書蟲回首那堪闕隱踪社友有時哀雪鶴  
那俟無地覓人龍紛紜品藻遺清思夭矯長松想瘦容  
幾度經過會灑泣冷烟衰草若堂封

又人對地不盡屬一蘇常縣遺以如夢共對餘餘餘  
朱餘純

名聞未遂覩清容此日衡門一笑逢風采已看同雪鶴  
追隨那得比雲龍幽居飽我烟霞趣高論開君錦繡胸

惜別不堪回首處柯西雲樹鎖重重

又聞未幾時節空此日謝門一美盡風采高香臺

仙人放汝下蓬瀛一種清標雪幻成每共坡翁消俗態

曾尋和靖締芳盟空山歲暮梅邊跡老屋更深月下聲

食祿乘軒心謝却從教鶴立在通明

又聞未幾時節空此日謝門一美盡風采高香臺

玉塵亂撒晝沉沉凍入胎禽思不禁寒夜聽泉仙骨聳

清霄覓伴海雲深月明赤壁三更夢雪霽蓬壺萬里心

更與幽人堅夙契飛來東閣一長吟

竹坡記

蔡景沈

會稽東南有嶺曰日鑄據其勝而居者曰宋氏地產宜竹隱君子曰值字元夫性愛之甚植以盈坡殆千數焉居之久而愛之愈甚因號竹坡能詩者播之詠歌予聞而喜之宋氏世居汴之徐州豐邑八世祖駢繼居雍邱家焉五世祖祁天聖中廷對第一大父宗年舉政和進士授中書郎建炎初隨駕南渡知越之剡縣事遂家于越其父敷通判潮州贈大中大夫紹熙改元之明年元夫以金部員外郎致仕攜其三子繼紹緒而托居于是焉元夫爲人清雅與竹同標畧納祿尚隱



人益稱之予素知其賢而不知其愛竹之甚也夫竹非草非木根本盛大沃土膏之深也枝葉秀茂得雨露之滋也節操堅勁歷風霜之久也取之爲竿可以釣鱸鯉排之爲簾可以和音律器之爲篋可以盛幣帛編之爲管可以重青史皆有益于世也使其生於荒涼寂寞之境則與凡草木等耳貞心素抱而不爲所愛賞也必矣因其生於宋氏之坡也鍾造化之秀得天地之清與松柏同盟宜其見愛於君子而相與爲莫逆也王子猷曰不可一日無此君吾知元夫之心與之同然耳然不知坡之宜於竹歟竹之宜於坡歟設有是竹無是

坡不得爲竹坡矣有是坡無是竹亦不得爲竹坡矣故以地之盛而言之謂之竹坡也宜以人之清而比之謂之竹坡也亦宜予爲之記覺清風在竹坡上矣

曰昔梅莊記語蘇軾詩之蘇子瞻賦蘇詩之蘇張士儼

予訪古至笛亭遇廣平齋主人出詩一軸曰梅莊卷諸文士所作也因論之曰莊以梅名莊之有梅固矣然咏歌之盛若此者莊也梅也亦可以言而論乎主人曰唯唯矍然而起導予步至後庭折還而東抵一書屋啓牖憑之則萬玉玲瓏周映簷宇是何葩之盛哉主人曰梅也予欣然諦觀不能去酒

至展席浩飲不覺沾醉復起憑牖倚涼風以醒酒面則暗香  
徐來撲鼻可愛是何香之清哉主人曰梅也予益欣悅返席  
更飲相與詠逋仙詩句及羅浮仙姝事則夕陽移影疎疎遠  
簾箔是何影之動哉主人曰梅也予拍掌大噱曰有是哉莊  
之有梅嘉矣主人其有契於梅乎主人曰諾吾子其繹之予  
曰昔周元公謂蓮爲花之君子梅獨非花之君子乎風霜之  
慘羣卉摧落不自矜梅則含芳吐萼非君子泐陰德以保陽  
精歟雨露之濡羣卉方坼蓓蕾梅則褪萼結實非君子建事  
功在神速歟風日之麗羣卉競紅紫以艷媚梅則自甘清素



非君子孤介不附炎熱歟雪月之潔羣卉吐非其時梅則萼  
綴梢懸非君子喜得雙清歟松竹之操羣卉穢非其儔梅則  
標同韻協非君子擇友三益歟主人以是玩梅則所得于梅  
者亦多梅莊非君子宅乎揚州之閣孤山之廬其足多讓矣  
乎主人曰善哉卽物涵理吾其論之請識其旨於壁以爲記

八升 味芹詩文類稿序

朱 簠

士君子扶植世教必立志以定正趨履道以回薄俗焉然志  
與道皆無形也無聲也是故志以言顯道以言行而志與道  
皆言也故曰詩以言志也文以載道也詩不拂乎志言不詭

乎道而正趨定而薄俗回矣扶植世教功莫大焉三代以還以詩鳴世者惟杜少陵以文名世者惟韓昌黎俱有規範蓋杜之詩韓之文非徒言也識者稱杜之詩曰史韓之文曰起八代之衰謂非能定正趨回薄俗不可也夫詩之稱夫杜者所謂出處去就好賢惡惡忠憤激烈讀之可知其世道之隆降文之稱夫韓者所謂周情孔思日光玉潔澤乎道德仁義比之武事推陷廓清之功偉矣於世教豈小補哉然杜之後非無詩韓之後非無文也第于定正趨回薄俗者未之多聞焉吾山陰宋味芹氏詩文胥克工不見其所謂拂志詭道正

趨之定薄俗之回可必矣世教不於是而扶植哉歲癸亥春  
正月之望予得其詩文稿各帙凡若干篇微詞奧旨正論格  
言皆不越乎杜韓之規範予誦之三閱月不能釋手不惟見  
夫規範韓杜之顏面殆若見焉周定齋氏予同年友也以詩  
文名世扶植世教稱者後峯社會品題古今人物若杜若韓  
者深嘉而樂與之其於味荒知之深與之重有素矣亦奚俟  
予言哉因爲序以誌不朽云夫出而於辭限其千出者五心  
對劍竹橋說而翰廬自楚映此數寄香然山劍來西簾宋中  
君子之處世非種福之難而能自種德之爲貴德而能自種



則凡宅心制行皆處善循理不望天之報不求人之知夫然後陰德日滋而餘福自致知此道者吾於山陰柯西里宋守拙氏父子見之守拙吾之戚友也而竹橋則其子也昔在乙卯之冬吾於守拙氏會晤於江塘舍浦之間其出言處事皆合於天理宜於人心比戊申之春又見守拙氏建立宗祠吾會爲纘言作記蓋取其深達孝義不斲天真其種德之基殆厚且遠矣乃今竹橋子跡若汨於塵氛心不涉於勢利自耕讀之外安分守己而惟以濟人利物爲心遠邈信庵君質直好義之風近遵守拙氏勤身儉家之訓且思昔夫宋編竹渡

蟻故事因以竹橋自况其爲人蓋可知矣是故推其輕財重  
義之心當與守拙同而探其濟人育物之事可與大宋並不  
求知于人 不望報于天種德之功深則種福之效應大宋固  
食報於身而竹橋子將食報於子若孫矣此宋氏之家法也  
吾何庸於言遂以此意質之味芹味芹曰子之言是也是吾  
姪孫偉之事也是固以竹橋自况之初心也蓋特叙始末以  
爲之說

商嘉言

商嘉言

昔宋謙父作驀山溪自述云壺山居士未老心先嬾非古今

來一懶人哉枳田先生非悚人而作悚窩圖毋乃未得其形似庸詎知不可懶者悉未之懶而可悚者則無一不悚也先生性孝友聰敏而樸誠閒靜少言不慕榮利嘗命予書邵元同先生忍默恕退四卦于座隅則其生平已可概見年甫冠欲謀菽水需走嶺南不得志歸復走山左亦不足內顧既而居停泰安郡守朱公遷兩淮都轉卽隨之揚州閱十載則其跋涉道途也夫何懶其在都轉署中也兩淮鹺務紛如麻先生掌牢盆禺筭日夜會計條分而縷析之無少差以致一身病蝟集年未壯鬢見霜則其爲人謀也亦何懶比還家自江



川移居海山復自海山徙州山築室栽花間養魚鳥博老母  
歡則其奉親也亦何慊令弟夏亭先生少先生十歲貿遷有  
無化居間有虧損先生弗之惜其愛弟也如子又何慊家有  
紅課樓延師教子姪輩讀雅好書不惜重價購舊書殘缺者  
必補綴裝訂且手抄孝經周禮儀禮爾雅諸書俾令嗣美斯  
日誦夜燈紅處復自課兒教句讀柝聲三下猶未休必俟其  
爛熟乃已風雨晦明俱無間以是美斯得讀等身書則其教  
子姪也復何懶壬癸年間髮無可白矣復以仰事俯育恐不  
貲走四明抱關則爲一家計長久也又何懶四明三載歸時

山陰江氏外史七言  
時念及宗祠將圯輒捐貲且勸族人共捐貲葺之不日落成  
家世有譜未開雕久不增葺多殘缺先生慮日後昭穆之莫  
辨卽遍搜舊譜手錄成帙復遍訪族人之遷徙他處者彙于  
山陬海澨間詳論其輩行名號歸增輯之卽付剞劂氏猶必  
躬校勘譜以成則是先生之克敬宗收族也又何懶間居檢  
閱本草諸書得青麟丸方可治一切病其方需藥多且貴又  
須三伏時十五番蒸曬乃佳先生不恤重貲亦不辭勞勩盛  
暑蟲蟲藥爐旁浹辰者兩躬自炮製間年一合以施人且別  
施膏丹諸藥則是先生之能濟人也又何懶先生在揚時有

業師金陵柯景韓先生病侍湯藥病革躬送回金陵師卽世  
親視含殮返及先生歸里師之子貧不能自存數數來先生  
家先生歛留曲至厚贈去戚好中有貧乏者率視此先生多  
女弟有甥數輩俱令其至紅課樓讀書卽予下榻紅課樓十  
年賴先生周急無算則是先生之睦嫻在極而且能振拔單  
寒也有如此何懶之足云何嬾之足云然而先生曰否否吾  
慄矣蓋先生客揚州年甫壯揆務必精待人以實以故主賓  
相得甚歡且兩淮鹽筴甲天下人不得一望其幕中脫賓之  
終身當作蓮花池上客乃先生稍得意卽飄然歸歸後主人



數仵來聘且頓促上道先生力辭不復出卽其遊四明非所  
好故不久卽歸是則先生之悚于遊也家居二十年足跡經  
年不入城市平素寡交遊間有客至不問客姓名卽問亦不  
記鄉鄰間一切慶弔委諸弟不復詣人親串有尺素書來忘  
作答是則先生之懶於酬酢也家設質庫不曾一握算有田  
數十雙催租置勿問有園一頃可以蔬不一窺屋數十楹聊  
蔽風雨亦未嘗事約椽紅課樓開窗可面山水且多古樹蒼  
鬱遲之又久始闢一扉是則先生之悚于求田問舍也居家  
未嘗製新衣故衣敝亦着之間或自補綴卽不復整頓酒戶

容一升許絕不飲經年可不一甌茶蔬食菜羹淡而不厭是則先生之懶於服食也事母孝溫清定省外不復與家人通一言友於弟怡怡如無所計議夫人常病目且盲亦不汲汲醫如夫人一罕交一語初課子勤近亦不甚督責間課女近亦罔聞弄孫矣未見一抱置膝上臧獲輩多駑鈍聽之而已是則先生之懶於處家也性好書看不終卷卽拋置頗嗜岐黃家言有古方必手錄近亦多東高閣九章法極精予得緝古算經一種懵然先生思索一炊許卽六通四闢亦不復省覽好圍棋嘗按譜譜中方罫小鎔以鉛作子黑白而按之偶

遇敵手一決勝敗勝固欣然敗亦可喜間作菓子戲比來亦  
廣陵散種菊花數十種荷兩缸建蘭三兩盆養畫眉數籠籠  
手製雕漆極精工有蜜蜂兩窠時復割蜜池養文魚數十頭  
作鑑湖垂釣圖一幀幀極長多名人題詠今皆弗復顧是則  
先生且懶於消遣也若然先生其坐忘乎墮肢體黜聰明離  
形去知同於大通先生曰予坐亦悚若然其入睡鄉乎昏然  
不生七情茫然不交萬事蕩然不知天地日月先生曰予睡  
亦懶其懶仙乎曰仙亦悚其孀禪乎曰禪亦懶然則號錢舜  
舉之習悚翁乎作白玉蟾之嬾翁齋乎而先生曰予悚亦孀



顧何以尚有此圖不知先生圖雖成而悚於名懶窩云者予  
爲先生名之而先生尚未之知也則并悚其所悚矣圖中茅  
屋一椽牽蘿補之多垂下障以籬籬門枝梧之則居悚童一  
侍藥爐旁作貉睡狀則童懶婢一點茗事不肯行有小兒拉  
之行則婢懶雞犬各二不作鳴吠形則雞犬俱懶蘭花一盆  
盆碎竹木數本多欹斜則花木俱懶磐石一先生阿堵中非  
坐非臥手書一卷已不看履一脫于地而先生懶矣劉後村  
詩云老懶堯夫不出窩范石湖詩云爭如懶窩高斯圖之謂  
與獨予館先生家十餘稔可懶者懶不可懶者亦懶卽記此

圖也已瀕蜀道行紅課樓中挑燈擁爐兩柝許草草記成絕  
無裁剪系以一詞亦第用壺山元韻而不能自出心裁則予  
之嬾當十倍先生先生其目笑之乎先生曰予嬾矣

益 枳田居士悚到無從嬾任老屋疎籬有藥鼎花盆茗椀雲

簾草褥欹石便拋書童睡去婢牽來夢况都難滿揚州

君當日那有功夫飯一自倦遊歸開紅課憑他燈盞十年留

星我我更悚於君書百本樹千章儘付賢郎管似右調驀山

魚溪用宋壺山韻士尚未之味也用其韻與圖山

應何以尚書此圖不味去主圖與而刺付各辦高云昔年

題宋枳田鑑湖垂釣圖來摘鮪青鱖非寒玉國梁母白  
君家山陰道門傍鑑湖曲扁舟數來往愛對浪花宿釣  
竿一在手遽令遠塵俗太府禮羅致溫石衆屢矚帛書  
走駿駸名字光剡牘露衣嶺嶠雲洗耳岱山瀑春風十  
里遊吟興追杜牧河渠與鹽鐵心計已爛熟偶拋蓮幕  
紅新買苔蓑綠烟波萬頃中寫出真面目齒冷羊裘人  
避跡翻局促

又漁父詞益湖回艇育蓼涇賦狀

紀珩

鑑曲波光綠鴨頭沿隄楊柳弄風柔挈小艇放中流桃



花源水道真遊興  
游倦歸來坐釣舟  
明漪影裏中竿投  
魚入饌酒盈甌  
何須有夢到揚州  
不能自識心機則不

又祝融風吹  
王女嶽

莫道種花好  
抱甕日多開  
日少休言養鳥樂  
寂寂簾櫳  
聲不作  
打破磁盃  
放出籠青  
蓑綠笠隨漁翁  
漁家之樂  
樂難數  
不畏斜風  
不愁雨鴨  
頭綠滿千頃湖  
春生楊柳  
秋菰蒲  
得魚沽酒  
唱歌飲醉來  
天地爲衾枕  
傲煞南船  
北馬人  
風塵面目  
都非真憶君  
作客天涯路  
岸幘風流  
爭企慕  
買山願  
遂便歸來  
酡顏青鬢  
非衰頹  
有藥母白

頭可以孝有溪有壤足耕釣花萼樓前花正舒健婦持  
家兒讀書泥中文婢長依鄭風詩載詠螽斯盛移家近  
托蘭渚山漁兄漁弟相往還新琢珊瑚竿在手新買新  
船繫新柳樂意相關不爲魚春風習習飄襟裾十年前  
寫垂綸照此日看來真酷肖捧圖倩客爲題詩幾番落  
筆轉自思歲歲求魚但緣木利藪名塲鮎上竹青衫枉  
負阿戎年林下高風愧昔賢縱欲釣魚釣不得畫中之  
人誠神仙

紅課樓歌贈主人宋枳田先生

商嘉言

梅莊梅竹坡竹梅花能白竹能綠却須一椀夜燈紅弈  
葉清芬課兒讀先生歸自文選樓北堂春永西堂幽萬  
花築起古蘭渚燈影書聲紅不休老學庵詩可類安樂

窩書且跋

邵無恙先生跋

仲宣

王漁山

登後幼瑒

紀雪生

來籠鳥池

魚都活潑招我樓頭住十年不應萬里走青天元龍百

尺夢中夢

陳二梅有夢遊紅課樓歌

黃鶴千盤仙外仙日歸重許山

樓宿課子課孫紅滿屋白水翠巖森寶書丹厓青壁蒼

竒木四時歌記響琛廬

樓下爲琛廬舊作樓中四時歌

再賦蘭亭三月

初先生漫畫懶窩嬾好看紅杏核頭春意開尚書



遺稿  
梅花賦  
垂拱三年余春秋二十有五戰藝再北隨從父之東川  
授館舍時病連月顧瞻危垣有梅一本敷葩於榛莽  
中喟然歎曰嗚呼斯梅託非其所出羣之姿何以別  
乎若其貞心不改是則可取也已感而乘興遂作賦  
高齋寥闐歲晏山深景翳翳以斜度風悄悄以亂吟坐  
窮簷而無朋進一觴以孤斟步前除以名子倚藜杖於

牆陰蔚有寒梅誰其封植未綠葉而先葩發青枝於宿  
枿擢秀敷榮冰玉一色胡雜逐乎衆草又蕪沒於叢棘  
匪王孫之見知羌潔白其何極若夫瓊英綴雪絳萼著  
霜儼如傅粉是謂何郎清馨潛襲疏蕊暗臭又如竊香  
是謂韓壽凍雨晚溼宿露朝滋又如英皇泣於九嶷愛  
日烘晴明蟾照夜又如神人來自姑射烟晦晨昏陰霾  
晝闕又如通德掩袖擁髻狂飈卷沙飄素摧柔又如綠  
珠輕身墮樓半開半含非默非言溫伯雪子目擊道存  
或俯或仰匪笑匪怒東郭慎子正容物悟或憔悴若靈

均或欬傲若曼倩或斌媚若文君或輕盈若飛燕口吻  
雌黃擬議難徧彼其藝蘭兮九畹采蕙兮五柞緝之以  
芙蓉贈之以芍藥玩小山之叢桂掇芳洲之杜若是皆  
物出於地產之奇名著於風人之託然而豔於春者望  
秋先零盛於夏者未冬已萎或朝開而速謝或夕秀而  
遙衰曷若茲卉歲寒特妍冰凝霜沍擅美專權相彼百  
花孰敢爭先鶯語方螿蟻房未喧獨步蚤春自全其天  
至若託迹隱深寓形幽絕恥鄰市塵甘遯巖穴江僕射  
之孤鐙向寂不怨棲遲陶彭澤之三徑投閒曾無悵結



貴不移於本性方有儷於君子之節聊染翰以寄懷用  
垂示於來哲從父見而勛之曰萬木僵仆梅英載吐子  
善體物永保貞固

應舉不赴後示同志 孝廉公 謹允

熙陽破重暝林羽俱翹翹車馬曷喧驟道傍晨啓關我  
亦驚酣睡攬衣起長嘆十年塵土夢不落衡茅間燈火  
理芸帙脫粟具朝餐濯纓無亂流啓戶有青山鄰叟愴  
懷抱倚杖共我言衫袂漉緇塵風霜凋朱顏歲月不待  
人遊子何當還

感述

進士公

諱迥

陰雨膏黍苗穎粟垂祿邱西風振林柯落葉何颼颼我  
非榮悴姿感嘆殊悠悠陰陽無停機歲序春復秋舒慘  
事稠叠忻感誰去留殷思古賢聖變理功何優氤氲太  
和氣薰蒸逮遐陬普天皆樂土沒齒吾何求

寄子京弟

元獻公

諱庠

八年三郡駕朱輪更忝鴻樞對國君老去師丹渾忘事  
少來之武不如人車中顧馬空能數海上逢鷗倍見親  
惟有弟兄歸隱志共將耕鑿報堯仁

咏史

排律

魏志其初魏鑿辟漢

景文公

諱祁

古有庸庸福人譏齷齷員生貪巧作奏死戒直如絃欲  
 重高門地非論媚竈天詩書大儒塚絲竹後堂旃東閣  
 翻芻馬西園竊富錢道謀誰執咎戶選不因賢朱鼓成  
 妖日羌鵠入賀年須防反室詔終取闔門憐異日讒成  
 錦先時默似蟬空貽後人嘆流涕掩青編  
 草木雜詠五首 五言古  
 童童挺十尋一蓋摩空綠斜月礙枝回涼烟附葉宿拙  
 斧無妄加要經匠者目 詠楠

蘇士公



虺蔓相結蟠虬梢互回屈紛若未契繩繁如已綸緯峭

格外團陰尤堪庇炎日

詠藤

紺實紛纍纍柔柯緩若若葉以代新陳花仍開續落味

雖不常御香能破醒惡

詠櫟

咳熾風葉張困皴雨皮厚叢櫟列蓋端攢旄注旗首物

以希見珍材綠怪志醜

咏海欒

有果產西裔作花凌蚤寒樹繁碧玉葉柯疊黃金丸上

都不可寄咀味獨長嘆

詠枇杷

自詠七律

四十為郎信倦遊  
虛名韁鎖太悠悠  
危心正似葵傾日  
衰質先于柳望秋  
要路風塵疲驥足  
故潭烟雨廢槎頭

穎灘漸報耕疇熟  
終乞閒身守一邱  
葉林壘黃金此土

上都頻見歲華陰  
偃息由來木茂林  
醉若有鄉須裂地

吏如逢隱即投簪  
予聞南方山水殊勝常有遊宦之願以歲限未滿不敢陳請  
銜無

窶數知容冗病似支離  
亦挫針况自疏家兄弟約他年

獨鼈故溪溥  
伯氏尤樂靜退嘗有詩戒予云獨鼈故溪溥

誤懷手版應弓招  
汨汨塵容葆鬢凋  
潘拙本無鄉曲譽

嵇鴛偏恃母兄驕  
雨畦菘葉晨羞薄  
風竈茶烟午睡銷

縱到北山堪自笑春蘿秋桂久寥寥

春景詞 調寄玉樓春

東城漸覺風光好皺縠波紋迎客棹綠楊烟外曉雲輕

紅杏枝頭春意鬧 浮生長恨歡娛少肯愛千金輕一

笑為君持酒勸斜陽且向花間畱晚照

賀賈相公覽杜工部北征篇作景和詩寄賈古詩一首

唐家六葉太平罷宮豔醉骨恬無憂孽虜訴天翠華出

模糊戰血腥九州乾瘡坤瘻四海破白日殺氣寒颼颼

少陵背城走行在採椁拾橡填饑喉眼前亂離不忍見



作詩感慨陳大猷北征之篇詞最切讀者心隕如摧軸  
莫肯念亂小雅怨自然流涕袁安愁才高位下言不入  
憤氣鬱屈蟠長虬今日奔亡匪天作向來顛倒皆廟謀  
忠骸佞骨相撐柱時燎同燼悲崑邱相君覽古慨前事  
追羨子美真詩流前王不見後王見願以此語貽千秋  
九日食糕春意開之名士具別樽歟少肯愛千金彈一  
飊館輕霜拂曙袍糗粢花飲鬪分曹劉郎不敢題糕字  
空負詩家一世豪

宣和五年季冬望皇上預賞元宵黎庶擁觀於闕下詩

以記之

中允公

諱惠國

臘月初圓夜元宵預賞時翠華臨絳闕緋炬蒸彤墀照  
陌珠千粒懸毬火百枝金吾魚鑰弛寶仗羽麾移管奏  
鈞天樂絃催壽岳詞擁隨皆壺御瞻仰盡鄉耆今夜懽  
逢霽明春恐負期與民同樂意天意已先知

荅親友問創居情況

剡尹公

諱宗年

否運適我丁沉思還自傷天胡縱醜虜滿目俱豺狼  
塵埋日轂錯刃割封疆龍飛未遑息蟻穴安有常卽仕  
以爲家假息巖谷傍譬諸涸轍鱗斗水足悠洋豈不念

桑梓神州在何方 豈不念邱壟陵寢在何鄉 巢林果堪

托邱首心未忘他年謹瞻候旋軫還舊鄉 安有常暗斗

否 滄海幾下武思豈自謝天賦 雖願氣漸日 財味與

蒼 賤丈問陰每計民 陸長公 韓宗

藝 覆即春怒貧隰與月同樂意天意日 夫映

險 天樂絲斷 霜 隨 翻 皆 壺 晦 翻 卅 盡 樂 青 今 奔 謝

酬 糝 干 絲 懸 絳 火 百 絲 金 吾 魚 餒 蛭 寶 外 陸 讓 絲 管 奏

蠟 尺 時 圓 亦 元 宵 前 賞 却 琴 華 翻 絲 闕 絲 秋 燕 汎 賦 烈

以晴之 申 伏 公 韓 惠



日鑄山居誌

金部公諱值

淳熙丁未之春值致仕歸剡道經日鑄聞故簽書樞密宋甯  
素公居於是遂進而見之叙及宗系則爲余叔氏也憶余與  
叔氏之先世居徐之豐邑建炎己酉三年國家定位臨安士  
民相率南來者咸就居吳越中一時子姓旣失所在予祖昌  
齡公則家於剡之方山叔氏又居於此幸假道里之緣邂逅  
一堂相依話舊可勝存亡興替之感哉日鑄古之勝區也峯  
迴鳥道路接銀河及之坦夷則又石瀨驚喧村花滿目以叔  
氏居之皤然玉貌將視商山採芝之老不如其欣東籬栽菊

之叟不如其逸也值今者憇于竹坡之上不復歸剡矣追從  
 叔氏朝探藤蘿之古暮宿嶺岫之旁以遨以遊其樂為奚如  
 耶倘有以世外幽踪來目予與叔氏二人者亦心竊許之也  
 嶺公固寒飲饑之式山殊凡父母其地幸以能里之熱戰  
 刃昧率南來香烟掠耳吳越中一劫下移而火洞亦平則其  
 殊刃之於世其斜之豐邑數炎古西三平園寢安分則安士  
 素公其然曼數然而具之殊其宗系阻氣余殊刃出謝余則  
 草濕丁未之春前煙升鶴陵彭孫日輪開姑發書跡密未嘗

日輪山景誌

金嶽公

六農樂農自叙

子顯公士忠

鏡水支流環映畝皆膏土也笛亭西映畝一區厥土尤膏焉  
予居其間而耕耨之歲耕入二十畝喜穀之積殆十鍾饗飡  
自給而無憂其心故於農事益勵因舍姓氏自爲樂農人亦  
以樂農稱之或非之曰四民惟農家最苦誦聶夷中詩可見  
矣矧又春雨旣濡秉耒而耕則沾手塗足襜褕不去體日炙  
而耨汗滴禾下土秋獲冒風霜膚有皴瘃子獨樂是者何居  
夫農而可樂則彼躋臚仕爲巨賈偃仰華寓而寒暑勿侵旁  
列絲竹而宮徵盈耳其樂又何若哉予聞掩耳而笑曰可食



以酒肉者可隨以鞭箠可授以官祿者可隨以鈇鉞夫既有  
所受人所制也其能免乎此山妻之戒老萊焉重利輕別離  
此又商婦之怨辭也孰若吾農家夫耕於野而比獲有秋甌  
窶滿篝汙邪滿車婦業千蠶則龍精蠶蠶吐絲滿室故常卒  
歲飽煖室家笑語吾意霄壤間孰有可樂于農家者哉子謂  
誦聶夷中詩孰若誦豳風七月詩乎夷中爲賦頌民困規耳  
七月詩脩言農事攸宜則農固可樂矣沾手塗足之勞農之  
分也曷足以戾農之樂哉或者自覘失詞而發頰曰吾未諳  
夫農家之樂也

欵人說

頃余客太原毗陵毛子子霞過余齋左值見余座隅榜自志一聯遂以此定交聯云那普天萬衆都無我與故笑這第一等事不讓人做非狂子霞殊賞許此聯然不無疑訝叩余曰先生之學何至普天萬衆都無之與也余笑而不答既而雨夜聞驢鳴瞿然臥起而重有所感爰自謂之欵作欵人說以示子霞子霞猶未之解後往復歲餘而始信余榜聯與欵人爲說之非甚夸詡云

客有過而問余者曰比聞先生之以欵自謂也於義何居余

曰嗟乎歎驢鳴也會人也而以歎自之謂然余聞之馬牛可  
應今余也日作息於馬牛下走之不自有異幾何其以歎謂  
之不可且余以窮愁方有事於論著閒發未數辭聞者失笑  
反走雖以是匡拂污漫自蔑沒喁然匏落泊如也顧縹迹樊  
中未能通廣閒不免於激雜叫號而一時之惡怒詆呵於余  
者往往異類絕之夫人各有情豈能自奪悲憤意烏年五十  
六十途日就於鬱塞昏毀行委填溝壑以死而癖繆鄙昧持  
彌下而視彌上蒙蔑待盡將終誰與歸也歲戊申之夏五余  
客處太原雨夜聞驢鳴呃嗟悽動瞿然臥起爲扼腕深歎悼



曰物不得其平則鳴彼鳴物之深入感發若爲愁恨悽苦鬱  
伊乎其不自己者歎驢得之然則余之見絕於世徒自深悲  
憤發聲爲愁恨悽苦惟歎驢之實似夫驢以不能人言故歎  
耳余人也能人語而不可以吾語語人舉世非之異類絕之  
鬱伊叫號之不自己不猶之是驢之不人語也而歎乎爰自  
謂之歎而以歎行曰歎人客聞言諷動謬爲嘲哂起前席而  
徐語於余曰敬聞命矣然有一言以進願先生察之曰黔南  
多虎比四出滿布闌巷驢其母歎余胡盧大笑爲投杖起稱  
謝曰唯

捕余既作歎說有爲余作歎圖以狀之者掀唇豎鬣昂頭振  
鬚喊若有所聲聞也者濠梁尹關號小埜以畫擅聲聞而宿  
翁工畫驢時以尹驢方之趙馬比見余歎人說扼腕稱歎因  
謂曰此一歎之說不足以盡先生魂磊爰圖余於瀑布松濤  
灣下幅巾藜杖竚聽驢歎團響一聲響徹空際展對命辭殊  
耳深贊賞贊曰語而不已且吾爾爾人舉世非之異於衆之  
則崇巖瀑布古樹濤聲歎驢喊徹呃嗙昂鳴幅巾拄杖浩氣  
憑陵竚立以視傾耳而聽耳中色見目裏聲形聲色不二  
曰團響空行平四野始無此之樂人無此苦無此悲無此樂

小埜之刻畫此圖固爲余寫照也展對之下知良工心苦  
復題之詩曰公其助賦堂想畫在初開謝賦負不爲山

巖瀑松濤聲應搏倚天長笑獨盤桓俄聞哢啞驢悽歎  
兀立回頭拄杖看曠曠日人閑舞不爲人思爲人爲士

盤薄游行五步閒詩肩聳瘦歎驢頑勝情軼絕操竒勝

囊抱橫琴足響山

感遇

促織吟

健婦斷指爪操作厲桑麻嬾婦長指爪深閨事鉛華貧  
者日以富富者日以貧三秋稻梁熟促織鳴四鄰唧唧



復唧唧懶婦貧亦織貧三無解藥煉外難四難

對兩浙輜軒錄載是詩並載見聞隨錄云山陰宋昆明

祖末諸生居江頭里游京師作感遇詩百首會徵鴻博

中書朱公尚隆素無交往見所作大愛之急以名上

下郡邑迹之無其人疑迹緇流檄僧綱司徧索越

下中諸蘭若而不知是已入閩終不應人以朱公愛士

之篤與是自處之高兩奇之商盤曰兒童不識字

對耕稼魏公莊卽旭堂感遇詩所謂懶婦貧亦織也

小林奉寄江西王府長史李伯喻先生毅菴公

憶昔曾聆教鐸音問安千里荷情深推恩已喜天頒詔  
輔德勞膺雪滿簪二美皇朝聯紫綬兩京人物盛青衿  
自嗟才薄明時棄葵藿徒傾向日心

奉送邑大尹李公欽取之京營  
北塘迢迢白石璨舊時行人愁沒厭北塘迢迢如砥平  
今日晝夜人坦行行人借問誰所創李公整舊更營新  
南山長松并鉅柏輓載如雪布工役茫然一帶若長虹  
驟雨狂瀾任衝激人言偉績誰可齊戴公之間蘇公堤  
生民有賴昭不朽金石正可同鐫題我公去年當考績

今春喜見初還邑綠琴韜秘未開彈丹詔聯翩又徵人  
西門畫鼓催行舟賓從雜沓馳鳴騶祖筵話別醉始休  
片帆目斷天西頭知公遺愛那能歇北塘歌聲聽不絕  
奉贄郡表戴公公行入骨問鼎論險幸公培軒公贊陳

屹然山岳孕魁奇擅世名才衆所推汲黯暫治東海郡  
山公嘗醉習家池河流蓄洩營諸閘隴麥高低秀兩岐  
早晚位登台鼎任道傍應植去思碑

奉上邑大尹張公公行入骨問鼎論險幸公培軒公贊陳  
鉅浸瀾漫白浪浮居民生計伴鳧鷗公行入骨問鼎論險幸公培軒公贊陳  
春驟雨仍兼夏



四野疎苗已迫秋，煉石孰將天漏補。  
導河誰窅水源流，尚祈租賦煩籌卹。  
慰我羣黎仰食憂，贊命坐待無郵獄。  
奉謝張大尹惠新歷

培軒公

花縣芳春布政條，又催農務向東臯。  
比閭共仰歌棠政，露冕甯煩勸稼勞。  
惠及衡門頌鳳歷，才羈小邑試牛刀。  
野翁晉謁慙疎陋，蕭颯秋霜滿鬢毛。

和荅公

女海昌衛嚴揮使見寄秋夜韻  
青蠅味芹公  
空齋坐深夜，四壁聞蟲聲。  
倦枕雲邊寐，夢嫌霜角驚。  
剪燈明睡眼，呼酒破愁城。  
歲月蹉跎易，傷秋恨不平。

謝周定齋招預後峯詩社其製韻長謝味芹公

洞府烟霞地詞仙風月懷清時啓文會華髮序賓階軒

冕情何在琴樽意自佳深諳詩禮貴縫掖忝吾儕

次拙齋朱公見寄韻風軒露漸澆手 味芹公

乞身歸故里味道咀皇墳纘緒考亭績憂時楚國氛忍

聞華髮侶塵澗錦袍紋不是鷹揚倦時清見右文業如

奉贄應二尹惠臨 味芹公

曾奮賢關披逆鱗撫民緝緝政何循贊治坐折無情獄

勸歲分行有脚春百里頌聲歸少府兩朝睿鑒識忠臣





雜記

八千之公省身示後  
山陰江頭宋氏祖居在焉余祖菲泉公贅居仁和祖母張氏  
父明葵公母朱氏生英自幼懦弱不離母側諸昆叔言膝邊  
之兒此語不謬垂髫尚不諳路之東西物之輕重惟以已度  
人之心誦念不忘祖訓也弱冠謹習勤儉欲爲宋門一無愧  
之子孫而不能奈坎坷多事業幾廢耳嗟嘆運蹇又遇饑年  
艱辛不免未幾世亂紛紛城市鄉村莫不輕去其鄉東西雜  
處我爲業藝所羈甘爲株守殘師擁省陷虐幸

大清

兵疾至驅之東渡得以無虞於是貿易漸甦始爲成立此亦天之所以延我而我之得論後人也莫不踵去其隳東西粹人生於世當以仁義孝悌爲先勿令人鄙薄上爲祖宗父母增光行良善事下積兒孫綿遠天道無虧豈曰無報一燕對親族鄰友必須恭敬謙讓不可藐視近來興衰只在轉眼非十年消長不一之古語也

國課存心早納前後不免徵比緊來一時難措反多閒費爲人寬厚者雖逢凶亦有贊襄可解刻薄者雖好事亦多誹謗不成

爲人須守法度毋入邪徑縱口腹愛奢華戀聲色濫交接順  
內言飾兒女此無盡窮之費不足重之人也

女人賢而勤儉全者能有幾人或不明而妒須用良言勸諭  
間有違心者不可縱而不言家庭爭忿日漸致生不測兒女  
不可縱其邪行心雖愛惜而貌必威嚴使其怕懼大則難治  
矣

祖先墳墓住居房屋逐年修整勿使年久崩頽修整費重遂  
致束手家伙什物隨時收拾修置不易莫不可懸畧一割尖  
祖業能守亦能成立諸凡生理不可輕信人言貪重利而輕



托人古云貪利慮害徒成覆敗常見妄行者種種墮阱細步  
穩行雖陷不深行業買賣必須認真籌算不可忽畧一時失  
計輕則利輕重則傷本平則難成與平次則難成與重則難成  
門戶火燭時刻須防晚來尤甚晏眠早起內外自皆畏服貪  
眠懶惰暗中必有侵損言而難心知難知其計則大損難成  
日用買物須要公平物有好歹勿聽名聲大小生意覓利一  
般刻則使人呪罵自己亦問心不去則而敏取則其情難  
婚喪二事宜從儉約行事小而用度寬人皆贊念外奢華而  
內尅減衆皆笑罵爲人說話冠冕行事詭譎被人識透不值

一錢

弟兄和順人不欺笑凡事商酌勿逞己能益則均沾損勿埋怨若存心稍有私己之見雖與人交易使之窺破猶被其輕賤合夥尚爾况手足乎

妯娌相得內外不敢侵犯巨細得失皆由前定勿因些小財物傷情致失家門元氣賢妒聲名無不外傳遺蘇蘇以存冊人生在世存良善心行正直事少人呪咀死後諒無罪犯生前作虧心孽障事死後卽難逃罪譴如果設齋建醮能釋其愆亦不必分善惡二字矣爲人子嗣豈父母故而不趨薦不

過盡人子之心以遮掩耳目耳于隔豈父母姑而不鼓薰不  
兒女總是日生若存溺愛偏庇私心已早開異日爭端卽非  
家庭之美兆夏善似谷五直車小人知也及對藉無罪味去  
世間陰鷲原非望人羨慕稱贊而行一言一動務須心存惻  
隱總以人己所不知者謂之陰鷲夫皆由前定也因此小相  
顛合鏗尚爾與手或平有好多多也名聲大也生惡亂利一  
惡苦存心醉官味与女原難與人交長斯女窳姁餘姁其難  
第只味馴人不烘笑以專商酒也豈与誰益限良哉財也數  
一餘一也



懼聞公考信緒江兩宗世次輩分說

昔我江宗系由剡溪自剡溪徙居會稽之日鑄自日鑄徙居  
山陰之江村江村之二初祖太庵公諱緒乃宋金部員外  
元夫公之子也一元夫公諱值與徙居赭川之一初祖宗午  
公諱似者爲同母兄弟廿宗午公伯兄居長廿元夫公季弟  
居四二太庵公視廿宗午公爲伯而二太庵公姪也二太庵  
公生於宋淳熙三年廿二世定齋公生於宋嘉泰二年廿三  
世衍齋公生於宋紹定五年廿夫四世庠員公生於宋景定五  
年廿五世梅莊公生於元至元二十年廿元夫公不載生年

以古三十年定世之數推計應生於宋紹興十九年前後  
緒川之初祖宗年公爲元夫公伯兄應生於宋紹興九年  
前後則吾江宗自宋紹興十九年生元夫公歷傳五世至  
元至元二十年梅莊公生其間沿歷宋元兩朝正朔甲子  
一百三十四年內有三世俱屬幼支以世紀年約畧以二十  
七年爲一世是爲得古今世數之常緒宗自一世宗年公  
起二世甯一公三世秀二公四世壽二提舉公五  
世原善公生年俱無考康熙十八年己未六月十六日我江  
宗弟而文姪章言往會緒川舊定稱弟之子威請錄緒川

六世祖思敬公生年木主所載實生於元至正丙午年則赭宗自宋紹興九年生宗午公歷傳五世至元至正二十六年丙午世思敬公生其間沿歷宋元兩朝正朔甲子二百二十八年以世紀年約以四十五年爲一世赭宗以長支傳僅五世而六世生年反遲後於江宗之歷傳三世幼支者百年此古今世數之絕無者現在赭川已一十八世前五世占年二百二十八之多後十三世歷年只三百一十約畧以二十四年爲一世前後相較懸殊况赭川五世之主毀失無考又故無譜譜之採錄出自晚近十年僅盈尺幅者十版其爲載



記又最率略疑誤種種則前五世之中顯有遺世缺傳者是年已六十子威亦年幾五十是與子威爲同輩兄弟此五百餘年之定稱也今據兩宗世次赭宗實遺缺二世若謂不誤凡是所同輩應以子威爲叔祖子威之昔以爲叔者今反應以子威爲叔矣背謬錯亂能無痛心要知定稱在前而作譜在後譜容有可誤而前稱必無可易故吾江宗惟有以初祖歷世之定稱爲據則赭譜之失缺失次咎歸赭宗而在我江宗自可置之不問尚有訛謬二端並從指斥以杜邪妄赭川良木公與江村景星公兄弟也當明世嘉靖辛酉科同舉

鄉榜時武林有兄弟同科之目其後兩宗訛口背競初不知何自而起亦不知何自而止在赭川謂吾良木公叔也景星公因同榜而紊稱兄弟江村又謂吾景星公叔也良木公因同榜而紊稱兄弟此實兩宗細人一時戲競之口絕無足憑者又有逢源者吾宋氏會稽支系太平里人也爲明季邑諸生逢源父吉雲公當明崇禎間以先侍郎恩愍肅公塋域涉訟因大會剡溪會稽山陰姚江蕭山五邑諸宗紳士共直之一時宗黨雲集主吉雲家吉雲出族譜叙分分定後坐次坐以齒時赭川天嶽公已成進士吉雲公分與雁行齒長揖坐

皆天嶽公右不以疎遠避主席一時以爲知禮此昭昭在族  
衆耳目者逢源之爲吉雲也子則爲天嶽也姪名正分定遵  
循莫渝沿歷至會大清康熙十年逢源復以先塋涉訟時  
赭川禹域又成進士逢源藉爲犄角訟獲理禹域爲天嶽公  
從孫行則逢源叔而禹域姪也逢源忽云據譜應有降稱降  
且二輩乃以禹域爲叔而自居姪行康熙二年是與赭川子  
揚叔太平里駿公弟同客京師時駿公與子揚以叔姪而雁  
行紊稱是詢知吉雲爲駿公祖於逢源叔也因舉吉雲公昔  
與天嶽公出族譜叙分之說駿公遲疑未果爰作書南質逢



源逢源手答與是舉說符駿公跋踏凡於吾宗之在京師前有紊稱者皆造謝叩頭引罪此是與子揚所同深歷夫吉雲弟天嶽而駿公祖吉雲子揚爲天嶽公姪行故駿公姪而子揚叔也則禹域之於天嶽公爲從孫而逢源爲姪固逢源叔而禹域姪也今逢源忽云據譜自降稱而降且二輩父子族譜互異一身前後兩稱此太平里族人自北自南甚有憤憤不平者是學識譎陋齒德卑微本無成見亦絕無勝心茲以變易世分於祖宗視之義關重大在子姓處之勢同紊亂故於疑則必稽而信亦從所考偶有疑緒敬抒一得以備存

參訂之末非敢偏持我見泥狃抗執也夫據譜似宜易稱倘  
誤譜似無妨正定今稽覈疑誤既鑿有可數則兩宗同初祖  
五百餘年來之定稱惡可輕易况稱前譜後名分歷大宗所  
世守私譜屬小宗所後出其爲可信據孰輕孰重後譜之詳  
畧可誤而前稱之定分必無可變此不易定論之較然者伏  
惟吾赭江兩宗賢明長者暨昆弟子姓念是樸誠俯從詳察  
共更定之上妥 先靈下平族論死生幸甚康熙十八年己  
未六月十九日敬會族衆刑牲告廟稽首具錄  
赭江兩宗稱呼相傳有差兩輩之說未識其所由起茲 穆

於舊書肆中得有十六世 懼聞公辨論兩宗世次慎疑  
一本始知兩宗向有定稱自康熙初年赭川作譜隨有降  
稱之誤細按赭川 始祖宗午公生於宋高宗紹興初年  
至元順帝至正二十六年而 思敬公生其間相去二百  
三十年相傳何止五世赭川以前數世木主毀失無考隨  
以 思敬公作六世率略作譜隨與向日定稱差訛兩輩  
即逢源之降稱想亦因此而紊亂耳各分攸關豈容終誤  
懼聞公考信頗確特摘錄附譜以告來者



懼聞公杖銘四則

一趨一步助壽而康煩君珍重恐幻龍翔

青谿漁隱

好辦芒鞋一鞵相依茶竈蒲團

冬日題於筠香閣

危而持顛而扶君之力是吾徒

閒壑

俯聽幽泉仰瞻絕巘老子婆娑相依無限

鍾山樵

夫無等觀

山陰江頭宋氏世譜卷三